

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
NOV 4 1939

T 3133/3514. 83

0008

永平府志卷之十五

哈佛大學漢和
圖書館珍藏印

人物志一

自古哲人偉士多奮跡於邊陲况永平爲清聖故墟漢
魏而後垂名史冊者代不乏人迨我

朝定鼎而夾輔之勲股肱之佐與夫以德行文章爲邦之
光者炳炳蔚蔚實足追前哲而昭來茲舊志每旁援境
外以附益之果足爲此邦重耶今皆不取焉而錄諸人
之實生於斯者若夫節義著於鄉閭才技得諸聞見雖
一端之善亦得以次相附繼起者克自振興媲美前徽
是余所深望也夫作人物志

列傳

商

伯夷叔齊孤竹君之二子也父欲立叔齊及父卒叔齊讓伯夷伯夷曰父命也遂逃去叔齊亦不肯立而逃之國人立其中子於是伯夷叔齊聞西伯昌善養老盍往歸焉及至西伯卒武王載木主號爲文王東伐紂夷齊叩馬而諫曰父死不葬爰及干戈可謂孝乎以臣弑君可謂仁乎左右欲兵之太公曰此義人也扶而去之武王已平殷亂天下宗周而伯夷叔齊耻之義不食周粟隱於首陽山采薇而食之及餓且死作歌其辭曰登彼西

山兮采其薇矣以暴易暴兮不知其非矣神農虞夏忽焉沒兮我安適歸矣吁嗟徂兮命之衰矣遂餓死於首陽山由此觀之怨耶非耶或曰天道無親常與善人若伯夷叔齊可謂善人者非耶積仁絜行如此而餓死且七十子之徒仲尼獨薦顏淵爲好學然回也屢空糟糠不厭而卒早天天之報施善人其何如哉盜跖日殺不辜肝人之肉暴戾恣睢聚黨數千人橫行天下竟以壽終是遵何德哉此其尤大彰明較著者也若至近世操行不軌專犯忌諱而終身逸樂富厚累世不絕或擇地而蹈之時然後出言行不由徑非公正不發憤而遇禍

災者不可勝數也余甚惑焉儻所謂天道是耶非耶子曰道不同不相爲謀亦各從其志也故曰富貴如可求雖執鞭之士吾亦爲之如不可求從吾所好歲寒然後知松栢之後凋舉世混濁清士乃見豈以其重若彼其輕若此哉君子疾沒世而名不稱焉賈子曰貪夫徇財烈士徇名夸者死權衆庶馮生同明相照同類相求雲從龍風從虎聖人作而萬物睹伯夷叔齊雖賢得夫子而名益彰顏淵雖篤學附驥尾而行益顯巖穴之士趨舍有時若此類名湮滅而不稱悲夫閭巷之人欲砥行立名者非附青雲之士惡能施於後世哉

史記

漢

公孫瓚字伯珪遼西令支人也爲郡門下書佐有姿儀大音聲故太守器之以女妻焉遣詣涿郡盧植讀經後復爲郡吏劉太守坐事徵詣廷尉瓚爲御車身執徒養及劉徙日南瓚具米肉於北芒上祭先人舉觴祝曰昔爲人子今爲人臣當詣日南日南瘴氣或恐不還與先人辭於此再拜慷慨而起時見者莫不欷歔劉道得赦還瓚以孝廉爲郎除遼東屬國長史嘗從數十騎出行塞見鮮卑數百騎瓚乃退入空亭中約其從騎曰今不衝之則死盡矣瓚乃自持矛兩頭施刃馳出刺胡殺傷數

十人亦亡其從騎半遂得免鮮卑懲艾後不敢復入塞
遷爲涿令光和中涼州賊起發幽州突騎三千人假瓚
都督行事傳使將之軍到薊中漁陽張純誘遼西烏丸
邱力居等叛劫畧薊中自號將軍畧吏民攻右北平遼
西屬國諸城所至殘破瓚將所領追討純等有功遷騎
都尉屬國烏丸貪至王率種人詣瓚降遷中郎將封都
亭侯進屯屬國與胡相攻擊五六年邱力居等鈔畧青
徐幽冀四州被其害瓚不能禦朝議以宗正東海劉伯
安旣爲德義昔爲幽州刺史恩信流著戎狄附之若使
瓚撫可不勞而而定乃以劉虞爲幽州牧虞到遣使至

胡中告以利害責使送純首邱力居等聞虞至喜各遣
譯自歸瓚害虞有功乃陰使人徼殺胡使胡知其情間
行詣虞虞上罷諸屯兵但留瓚將步騎萬人屯右北平
純乃棄妻子逃入鮮卑爲其客王政所殺送首詣虞封
政爲列侯虞以功卽拜太尉封襄賁侯會董卓至洛陽
遷虞大司馬瓚奮武將軍封薊侯關東義兵起卓遂劫
帝西遷徵虞爲太傅道路隔塞信命不得至袁紹韓馥
議以爲少帝制於姦臣天下無所歸心虞宗室知名民
之望也遂推虞爲帝遣使詣虞虞終不肯受紹等復勸
虞領尙書事承制封拜虞又不聽然猶與紹等連和虞

子和爲侍中在長安天子思東歸使和僞逃卓潛出武關詣虞令將兵來迎和道經袁術爲說天子意術利虞爲援留和不遣許兵至俱西令和爲書與虞虞得和書乃遣數千騎詣和瓚知術有異志不欲遣兵止虞虞不可瓚懼術聞而怨之亦遣其從弟越將千騎詣術以自結而陰教術執和奪其兵由是虞瓚益有隙和逃術來比復爲紹所留是時術遣孫堅屯陽城拒卓紹使周昂奪其處術遣越與堅攻昂不勝越爲流矢所中死瓚怒曰余弟死禍起於紹遂出軍屯磐河將以報紹紹懼以所佩渤海太守印綬授瓚從弟範遣之郡欲以結援範

遂以渤海兵助瓚破青徐黃巾兵益盛進軍界橋以嚴綱爲冀州田楷爲青州單經爲兗州置諸郡縣紹軍廣川令將麴義先登與瓚戰生禽綱瓚軍敗走渤海與範俱還薊於大城東南築小城與虞相近稍相悵望虞懼瓚爲變遂舉兵襲瓚虞爲瓚所敗出奔居庸瓚攻拔居庸生獲虞執虞還薊會卓死天子遣使者段訓增虞邑督六州瓚遷前將軍封易侯瓚誣虞欲稱尊號脅訓斬虞瓚上訓爲幽州刺史瓚遂驕矜記過忘善多所賊害虞從事漁陽鮮于輔齊周騎都尉鮮于銀等率州兵欲報瓚以燕國閻柔素有恩信共推柔爲烏丸司馬柔招

誘爲烏丸鮮卑得胡漢數萬人與瓚所置漁陽太守鄒
丹戰于潞北大破之斬丹袁紹又遣麴義及虞子和將
兵與輔合擊瓚瓚軍數敗乃走還易京固守爲圍塹十
重於塹裏築京皆高五六丈爲樓其上中塹爲京特高
十丈自居焉積穀三百斛瓚曰昔謂天下事可指麾而
定今日視之非我所決不如休兵力田畜穀兵法百樓
不攻今吾樓櫓千重食盡此穀足知天下之事矣欲以
此弊紹紹遣將攻之連年不能拔建安四年紹悉軍圍
之瓚遣子求救於黑山賊復欲自將突騎直出傍西南
山擁黑山之衆陸梁冀州橫斷紹後長史關靖說瓚曰

今將軍將士皆已土崩瓦解其所以能相守持者顧戀
其居處老小以將軍爲主耳將軍堅守曠日袁紹要當
自退自退之後四方之衆必復可合也若將軍今舍之
而去軍無鎮重易京之危可立待也將軍失本孤在草
野何所成耶瓚遂止不出救至欲內外擊紹遣人與子
書刻期兵至舉火爲應紹候者得其書如期舉火瓚以
爲救兵至遂出欲戰紹設伏擊大破之復還守紹爲地
道突壞其樓稍至中京瓚自知必敗盡殺其妻子乃自
殺鮮于輔將其衆奉王命以輔爲建忠將軍督幽州六
郡太祖與袁紹相拒於官渡閻柔遣使詣太祖受事遷

護烏丸校尉而輔身詣太祖拜左渡遼將軍封亭侯遣
還鎮撫本州太祖破南皮柔將部曲及鮮卑獻名馬以
奉軍從征三郡烏丸以功封關內侯輔亦率其衆從文
帝踐阼拜輔虎牙將軍柔渡遼將軍皆進封縣侯位特
進 後漢書

〔吳〕

韓當字義公遼西令支人也以便弓馬有膂力幸於孫堅
從征伐周旋數犯危難陷敵擒虜爲別部司馬及孫策
東渡從討三郡遷先登校尉授兵二千騎五十匹從征
劉勲破黃祖還討鄱陽領樂安長山越畏服後以中郎

將與周瑜等拒破曹公又與呂蒙襲取南郡遷偏將軍
領永昌太守宜都之役與陸遜朱然等共攻蜀軍於涿
鄉大破之徙威烈將軍封都亭侯曹真攻南郡當保東
南在外爲帥厲將士同心固守又敬望督司奉遵法令
權善之黃武二年封石城侯遷昭武將軍領冠軍太守
後又加督都之號將敢死及解煩兵萬人討丹陽賊破
之會病卒子綜襲侯領兵其年權征石陽以綜有憂使
守武昌而綜淫亂不軌權雖以父故不問綜內懷懼載
父喪將母家屬部曲男女數千人奔魏魏以爲將軍封
廣陽侯數犯邊境殺害人民權常切齒東興之役綜爲

前鋒軍敗身死諸葛恪斬送其首以白權廟

三國志

晉

閻亨遼西人苟晞爲大都督督青徐六州諸軍事刑政苛虐縱憤肆欲亨以書固諫晞怒殺之

見晉書苟晞傳

後周

怡峯字景阜遼西人也本姓默台因避難改焉高祖寬燕遼西郡守魏道武時率戶歸朝拜羽真賜爵長蛇公會祖文冀州刺史峯少從征役以驍勇聞永安中假龍驤將軍爲都將從賀拔岳討万俟醜奴以功授給事中明威將軍轉征虜將軍都督賜爵蒲陰縣男及岳被害峯

與趙貴等同謀翊戴太祖進爵爲伯時原州刺史
猶爲侯莫陳悅守太祖令峯與侯莫陳崇討擒之及
神武與魏孝武帝構隙帝頻勅太祖簡銳卒入衛京邑
太祖乃令峯與都督趙貴等率輕騎赴洛陽至潼關值
魏孝武西遷峯卽從太祖拔回洛復潼關拜安東將軍
華州刺史尋轉大都督討曹泥有功進爵華陽縣公邑
一千戶大統二年從太祖破竇泰於小關還拜散騎常
侍車騎大將軍儀同三司又從復宏農破沙苑進爵樂
陵郡公仍與元季海獨孤信復洛陽峯率奇兵至成皐
入其郭收其戶口而還東魏遣行臺任祥率步騎萬餘

攻潁川峯復以輕騎五百邀擊之自是威名轉盛加授
開府儀同三司東魏圍洛陽峯與季海守金墉太祖至
圍解卽與東魏戰於河橋時峯爲左軍不利與李遠先
還太祖因此班師詔原其罪拜東西北三夏州諸軍事
夏州刺史後與于謹討劉平伏從解玉壁圍平栢谷塢
竝有功涼州刺史宇文仲和反峯與于謹討之十五年
東魏圍潁川峯與趙貴赴援至南陽遇疾卒時年五十
峯沉毅有膽畧得士卒心當時號爲驍將太祖嗟悼久
之贈華州刺史諡曰襄威子昂嗣官至開府儀同三司
朝廷追錄峯功封昂鄭國公昂弟光少以峯勲賜爵安

平縣侯起家員外散騎常侍累遷司土中大夫左武伯
出爲汾涇幽三州刺史加開府儀同三司進爵龍河縣
公光弟春少知名歷官吏部下大夫儀同三司

周書

段永字永賓其先遼西石城人晉幽州刺史匹磾之後也
曾祖愧仕魏黃龍鎮將因徙高陸之河陽焉永幼有志
操閭里稱之魏正光末六鎮擾亂遂攜老幼避地中山
後赴洛陽拜殿中將軍稍遷平東將軍封沃陽縣伯邑
五百戶青州人崔社客舉兵反永討平之進爵爲侯除
左光祿大夫時有賊魁元伯生率數百騎西自嶠潼東
至鞏洛屠陷塢壁所在爲患魏孝武遣京畿大都督匹

婁昭討之昭請以五千人行永進曰此賊既無城柵唯以寇抄爲資安則蟻聚窮則鳥散取之在速不在衆也若星馳電發出其不虞精騎五百自足平殄若徵兵而後往彼必遠竄雖有大衆無所用之帝然其計于是命永代昭以五百騎討之永覘知所在倍道兼進遂破平之帝西遷永時不及從大統初乃結宗人潛謀歸欵密與都督趙業等襲斬西中郎將慕容顯和傳首京師以功別封昌平縣子邑三百戶除北徐州刺史從擒竇泰復宏農破沙苑竝有戰功進爵爲公河橋之役永力戰先登授南汾州刺史累遷大都督車騎大將軍儀同三

司散騎常侍驃騎大將軍開府儀同三司賜姓爾綿氏魏廢帝元年授恒州刺史于時朝貴多其部人謁永之日冠蓋盈路當時榮之孝閔帝踐祚進爵廣城郡公轉文州刺史入爲工部中大夫遷軍司馬保定四年拜大將軍永歷任內外所在頗有聲稱輕財好士朝野以此重焉前後累增凡三千九百戶天和四年授小司寇尋爲右二軍總管率兵北道講武遇疾卒于賀葛城年六十八喪還高祖親臨贈使持節柱國大將軍同華等五州刺史諡曰基子岌嗣官至儀同二司兵部下大夫

周書

唐

韓愈字退之鄧州南陽人七世祖茂有功於後魏封安定王父仲卿爲武昌令有美政旣去縣人刻石頌德終秘書郎愈生三歲而孤隨伯兄會貶官嶺表會卒嫂鄭鞠之愈自知讀書日記數千百言比長盡能通六經百家學擢進士第會董晉爲宣武節度使表署觀察推官晉卒愈從喪出不四日汴軍亂乃去依武寧節度使張建封建封辟府推官操行堅正鯁言無所忌調四門博士遷監察御史上疏極論宮市德宗怒貶陽山令有愛在民民生子多以其姓字之改江陵法曹參軍元和初權

知國子博士分司東都三歲爲真改都官員外郎卽拜河南令遷職方員外郎華陰令柳澗有罪前刺史劾奏之未報而刺史罷澗諷百姓遮索軍頓役直後刺史惡之按其獄貶澗房州司馬愈過華以爲刺史陰相黨上疏治之旣御史覆問得澗贓再貶封溪尉愈坐是復爲博士卽才高數黜官又下遷乃作進學解以自諭執政覽之奇其才改比部郎中史館修撰轉考功知制誥進中書舍人初憲宗將平蔡命御史中丞裴度使諸軍按視及還具言賊可滅與宰相議不合愈亦奏言淮西連年侵掠得不償費其敗可立而待然未可知者陛下斷

與不斷耳執政不喜會有人詆愈在江陵時爲裴均所厚均子鏐素無狀愈爲文章字命鏐謗語囂暴由是改太子右庶子及度以宰相節度彰義軍宣慰淮西奏愈行軍司馬愈請乘遽先入汴說韓宏使協力元濟平遷刑部侍郎憲宗遣使者往鳳翔迎佛骨入禁中三日乃送佛祠王公士庶奔走膜拜至爲夷法灼體膚委珍貝騰沓係路愈聞惡之乃上表極諫帝大怒持示宰相將抵以死裴度崔群曰愈言許替罪之誠宜然非內懷至忠安能及此願少寬假以來諫爭帝曰愈言我奉佛太過猶可容至謂東漢奉佛以後天子咸天促言何乖刺

耶愈人臣狂妄敢爾固不可赦于是中外駭懼雖戚諸貴亦爲愈言乃貶潮州刺史既至潮以表哀謝帝既感悔欲復用之持示宰相曰愈前所論是大愛朕然不當言天子事佛乃年促耳皇甫鎛素忌愈直卽奏言愈終狂踈可且內移乃改袁州刺史初愈至潮問民疾苦皆曰惡溪有鱷魚食民畜產且盡民以是窮數日愈自往視令其屬秦濟以一羊一豕投溪水而祝之是夕暴風震電起溪中數日水盡涸西徙六十里自是潮無鱷魚患袁人以男女爲隸過期不贖則沒入之愈至悉計庸得贖所沒歸之父母七百餘人因與約禁其爲隸

拜國子祭酒轉兵部侍郎鎮州亂殺田宏正而立王廷湊詔愈宣撫旣行衆皆危之元稹言韓愈可惜穆宗亦悔詔愈度事從宜無必入愈曰安有受君命而滯留自顧遂疾驅入廷湊嚴兵迓之甲士陳庭旣坐廷湊曰所以紛紛者乃此士卒也愈大聲曰天子以公爲有將帥材故賜以節豈意同賊反邪語未終士前奮曰先太師爲國擊朱滔血衣猶在此軍何負朝廷乃以爲賊乎愈曰以爲爾不記先太師也若猶記之固善且爲逆與順利害不能遠引古事但以天寶來禍福爲爾等明之安祿山史思明李希烈梁崇義朱滔朱泚吳元濟李師道

有若子若孫在乎亦有居官者乎衆曰無愈曰田公以魏博六州歸朝廷官中書令父子受旗節劉悟李祐皆大鎮此爾軍所共聞也衆曰宏正刻故此軍不安愈曰然爾曹害田公又殘其家復何道衆乃謹曰侍郎語是廷湊恐衆心動遽麾使去因泣謂愈曰今欲廷湊何所爲愈曰神策六軍之將如牛元翼比者不少但朝廷顧大體不可棄之公久圍之何也廷湊曰卽出之愈曰若爾則無事矣會元翼亦潰圍出廷湊不追愈歸奏其語帝大悅轉吏部侍郎時宰相李逢吉惡李紳欲逐之遂以愈爲京兆尹兼御史大夫特詔不臺參而除紳中丞

紳果劾愈愈以詔自解其後文刺紛然宰相以臺府不
協遂罷愈爲兵部侍郎而出紳江西觀察使紳見帝得
留愈亦復爲吏部侍郎長慶四年卒年五十七贈禮部
尚書諡曰文愈性明銳不詭隨與人交終始不少變成
就後進士往往知名經愈指授皆稱韓門弟子愈官顯
稍謝遣凡內外親若交友無後者爲嫁遣孤女而恤其
親嫂鄭喪爲服期以報每言文章自漢司馬相如太史
公劉向揚雄後作者不世出故愈深探本元卓然樹立
成一家言其原性原道師說等數十篇皆與衍宏深與
孟軻揚雄相表裏而佐佑六經云至它文造端置辭要

爲不襲蹈前人者然惟愈爲之沛然若有餘至其徒李
翱李漢皇甫湜從而效之遠不及遠甚從愈遊者若孟

郊張籍亦皆自名於時

唐書

毛西河曰舊唐書曰韓愈昌黎人此據李翱行狀而署
之者也新書改曰鄧州南陽人此據皇甫湜神道碑與
李白作愈父仲卿碑而改之者也然皆未是者退之祭
十二郎文有曰從嫂歸塋河陽又曰吾往河陽省墓其
作女孥壙銘又曰歸骨于河南之河陽韓氏墓而塋之
則退之寔河內之河陽人也其曰昌黎伯則宋後崇祀
封號非爵里也而其自稱亦曰昌黎韓愈者意者退之

先世自弓高侯後有仕北魏爲常山太守及征南將軍者曾居昌黎而世襲稱之此如杜甫居襄陽而自稱杜陵野老正同耳

按今之昌黎乃遼之廣寧金大定間始改今名與漢唐郡縣亦不相涉詳見顧寧人京東考古錄第自有明以來建祠奉祀旣已有年故仍列之如右

田廷玠平州盧龍人尙儒學不樂軍旅與承嗣爲從昆弟仕爲平舒丞遷樂壽清池東城河間四縣令以治稱遷滄州刺史李寶臣朱滔與承嗣不協合兵圍滄州廷玠固守連年食雖盡無叛者朝廷嘉其節徙相州承嗣盜

磁相廷玠無所回染及悅代立忌廷玠之正名爲節度副使廷玠至讓悅曰而承伯父緒業當守朝廷法度以保富貴何苦與恒鄆爲叛臣自兵興來叛天子能完宗族者誰耶而志不悛盍殺我無令我見田氏血汚人刀也遂稱疾不出悅過謝之杜門不納憤而卒

唐書

田宏正字安道廷玠之子幼通兵法善騎射承嗣愛之以爲必興吾宗名之曰興季安時爲衙內兵馬使同節度副使封沂國公季安侈汰銳殺罰宏正從容規切軍中賴之翕然歸重季安內忌出爲臨清鎮將欲因罪誅之宏正陽痺痼臥家不出乃免季安死子懷諫襲節度名

還舊職懷諫委政于家奴蔣士則措置不平衆怒咸曰
兵馬使吾帥也牙兵卽詣其家迎之宏正拒不納衆譁
于門宏正出衆拜之脅還府宏正頓于地度不免卽令
于軍曰爾屬不以吾不肖使主軍今與公等約能聽命
否皆曰惟公命因曰吾欲守天子法舉六州版籍請吏
于朝苟天子未命敢有請吾旂節者死殺人及掠人者
死皆曰諾遂到府殺士則及支黨十餘人於是圖魏博
相衛貝澶之地籍其人以獻不敢署僚屬而待王官先
時諸將出屯質妻子里民不得相往來宏正悉除其禁
聽民通饋謝慶弔服玩僭侈者卽日撤毀之承嗣時正

寢華顯宏正避不敢居更就採訪使堂皇聽事幽恒鄆
蔡大懼遣客鑄說鈞染宏正皆拒遣之憲宗美其誠詔
檢校工部尙書充魏博節度使又遣司封郎中知制誥
裴度宣慰賚其軍錢五百萬緡六州民給復一年赦見
囚存問高年惇獨廢疾不能自存者度明辯具陳朝廷
厚意宏正不覺自失乃深相結納奉上益謹復請度徧
行其部宣示天子恩詔因令節度僉謀布衣崔權奉表
陳謝且言天寶以來山東輿壤化爲戎墟官封世襲刑
賞自出國家含垢垂六十年臣若假天之齡奉陛下宸
筭冀道揚太和洗濯僞風然後退歸邱園避賢者路死

不恨制詔褒答且賜今名錫與踵塗天子討蔡宏正遣
子布以兵三千進戰數有功而李師道疑其襲已不敢
顯助蔡故元濟失援王師得致誅焉王承宗叛詔宏正
以全師壓境破其衆南宮承宗懼窮歸于宏正宏正表
諸朝遂獻德棣二州以謝納二子爲質俄而李師道拒
命詔宏正與宣武等五節度兵進討宏正自楊劉渡河
距鄆四十里堅壁師道大將劉悟率精兵屯河東戰陽
穀再遇再北斬萬餘級賊勢蹙悟乃反兵斬師道首詣
宏正降取十有二州以獻初悟旣平賊大張飲軍中凡
三日設角觥戲引魏博使至廷以爲歡悟盱衡攘臂助

其決坐中皆憚悟勇客有白宏正者宏正曰鄆士疲於
戰瘡者未起悟當卹亡弔乏慰士大夫心奈何取快目
前耶吾奉詔按軍伺悟去就今知其無能爲也旣而詔
悟爲義成軍節度使狼狽上道時稱知悟之明以功加
宏正檢校司徒同中書門下平章事是歲來朝對麟德
殿眷勞殊等引見僚佐將校二百餘人皆有頒賜進兼
侍中實封戶三百擢其兄融爲太子賓客東都留司宏
正數上表固請留闕下帝勞曰昨韓宏以疾辭不就軍
朕旣從之矣今卿復爾我不應違但魏人樂卿之政四
隣畏卿之威爲朕長城又安用辭宏正遂還常欲變山

東承襲舊風故悉遣子姓仕朝廷帝皆擢任之朱紫滿門榮冠當時穆宗立王承元以成德軍請帥帝詔宏正兼中書令爲節度使宏正以新與鎮人戰有父兄怨取魏兵三千自衛入其軍時天子賜錢一百萬緡不時至軍有怨言宏正親加撫諭乃安仍請留魏兵爲紀綱以持衆心度支崔俊客其廩沮郤之長慶元年七月歸衛卒於魏是月軍亂并家屬將吏三百餘人皆遇害年五十八帝聞震悼冊贈太尉諡曰忠愍宏正幼孤事融甚謹軍中嘗分曹習射宏正注矢聯中融退怒扶之故當季安猜暴時能自全及爲軍中推迫融不悅曰爾竟不

自悔取禍之道也朝廷知其友愛詔拜相州刺史賜金紫宏正性忠孝好功名起樓聚書萬餘卷通春秋左氏與賓屬講論終日客爲著沂公史例行于世宏正子布羣牟布字敦禮幼機悟宏正戍臨清布知季安且危密白父請以衆歸朝宏正奇之及得魏使布總親兵王師誅蔡以軍隸嚴綬屯唐州帝以布大臣子或有罪且撓法宏正請以董曉代而士卒愛布願留帝乃止凡十八戰破陵雲柵下郟城以功授御史中丞裴度輕出觀兵沱口賊將董重質以奇兵掩擊布伏騎數百突出薄之諸軍繼至賊驚引還蔡平入爲左金吾衛將軍諫官嘗

論事帝前同列將麾郤之布止曰使天子容直臣毋輕
進宏正徙成德以布爲河陽節度使父子同日受命時
韓宏與子公武亦皆領節度而天下以忠義多田氏布
所至必省冗將募戰卒寬賦勸穡人皆安之長慶初徙
涇原宏正遇害魏博節度使李愬病不能軍公卿議以
魏彊而鎮弱且魏人素德宏正以布之賢而世其官可
以成功穆宗遽召布解纒拜檢校工部尙書魏博節度
使乘傳以行布號泣固辭不聽乃出伎樂與妻子賓客
訣曰吾不還矣未至魏三十里跣足披髮號哭而入居
聖室屏節旄凡將士老者兄事之祿奉月百萬不入

私門又發家錢十餘萬緡頒士卒以牙將史憲誠出麾
下可任乃委以精銳時中人屢趣戰而度支饋餉不繼
布輒以六州租賦給軍引兵三萬進屯南宮破賊二壘
于是朱克融據幽州與王廷湊唇齒河朔三鎮舊連衡
桀驁自私而憲誠蓄異志陰欲乘釁又魏軍驕悍格戰
會大雪師寒糧乏軍中謗曰它日用兵團粒米盡仰朝
廷今六州刮肉與鎮冀角死生雖尙書瘠已肥國魏人
何罪憲誠得間因以搖亂會有詔分布軍合李光顏救
深州兵怒不肯東衆遂潰皆歸憲誠惟中軍不動布以
中軍還魏明日會諸將議事衆譁曰公能行河朔舊事

則生死從公不然不可以戰布度衆且亂嘆曰功無成矣卽爲書謝帝曰臣觀衆意終且負國臣無功不敢忘死願速救元翼毋使忠臣義士塗炭于河朔哭授其從事李石訖乃入至几筵引刀刺心曰上以謝君父下以示三軍言訖而絕年三十八贈尙書右僕射諡曰孝子鐵宣宗時歷銀州刺史坐以私鎧易邊馬論死宰相崔鉉奏布死節于國可貸鐵以勸忠烈故貶爲州司馬群會昌中歷葵州刺史坐贓且抵死兄肇聞之不食卒宰相李德裕奏漢河間人尹次潁川人史玉坐殺人當死次兄初玉毋渾詣官請代因縊物故于時皆赦其罪于

是武宗詔減死一等牟寬厚明吏治爲神策大將軍開成初鹽州刺史王宰失羌人之和詔牟代之累遷鄜坊節度使再徙天平二爲武寧一爲靈武軍官至檢校尙書左僕射卒諸子皆有方面功以忠義爲當世所高

書

周寶字上珪平州盧龍人曾祖代選爲魯城令安祿山反率縣人拒戰死之祖光濟事平盧節度希逸爲牙將每戰得攻魯城者必手屠之歷左贊善大夫從李膺以徐州歸天子父懷義通書記累擢檢校工部尙書天德西城防禦使以徙城事不爲宰相李吉甫所助以憂死寶

永平府志 卷之五
籍蔭爲千牛備身天平節度使殷侑嘗爲懷義參軍寶
從之爲部將會昌時選方鎮才校入宿衛與高駢皆隸
右神策軍歷良原鎮使以善擊毬俱補軍將駢以兄事
寶寶彊毅未嘗詘意于人官不進自請以毬見武宗稱
其能擢金吾將軍以毬喪一目進檢校工部尙書涇源
節度使務耕力聚糧二十萬斛號良將黃巢據宣歙徙
寶鎮海軍節度兼南面招討使巢聞出采石畧揚州僖
宗入蜀加檢校司空時羣盜所在盤結柳超據常熟王
敖據崑山王騰據葉亭宋可復據無錫寶練卒自守發
杭州兵戍縣鎮判八都石鏡都童昌主之清平都陳晟

主之于潛都吳文舉主之鹽官都徐及主之新登都杜
稜主之唐山都饒京主之富春都文禹主之龍泉都凌
文舉主之中和二年進同中書門下平章事兼天下租
庸副使封汝南郡王寶和裕喜接士以京師賊陷將赴
難益募兵號後樓都明年董昌據杭州柳超自常熟入
睦州刺史韋諸殺之四年餘杭鎮使陳晟攻諸諸以州
授晟寶子璵統後樓都辱不能馭軍部伍橫肆寶亦稍
惑聲色不恤事以壻楊茂實爲蘇州刺史重斂人不聊
生田令孜以趙載代之實不受命寶表留不聽乃殘郭
署汙垣牖去詔以王蘊代載載留潤州初鎮海將張郁

以擊毬事寶光啟初據賊剽崑山寶遣郁領兵三百戍海上郁醉而叛王蘊謂州兵還休不設備郁遂大掠蘊嬰城守寶遣將拓拔從討定之郁保常熟因攻常州刺史劉革迎降衆稍集寶遣將丁從實督兵攻之郁走海陵依鎮遏使高霸從實遂據常州及董昌徙義勝軍節度使寶承制擢杭州都將錢鏐領州事宣州賊李君旺陷義興守之是時右散騎常侍沈誥使至江南負田令孜勢震暴州縣嗣襄王下令搜令孜黨寶收誥及趙載殺之高駢領鹽鐵辟寶子佶爲支使寶亦表駢從子在幕府駢爲都統凌不禮寶寶銜之帝在蜀淮南絕貢賦

謾言道浙西爲寶剽阻帝知其誣不直駢自是顯隙駢出屯東塘約西定京師寶喜將赴之或曰高氏欲圖公地寶未信駢遣人請會金山謀執寶寶答曰平時且不聞境上會况上蒙塵宗廟焚辱寧高會時耶我非李康不能爲人作功動欺朝廷也駢遣人切讓寶亦詬絕之會部將劉浩刁頽與度支催勘使太子左庶子薛朗叛寶方寢外兵格鬪火照城中寶驚出諭曰爲吾用則吾兵否則寇也六州皆我鎮何往不適乃自青陽門出奔士大掠官屬崔縮陸鏐田倍皆死浩奏朗領府事實至奔牛埭駢饋以壘葛諷其且亡也寶抵于地曰公有呂

用之難方作無謂我卽奔常州依丁從實召後樓都無
一士至者錢鏐遣杜稜徐及攻薛朗稜子建徽攻從實
聲言迎實擊破賊君旺取船八百艘遂圍常州從實奔
海陵鏐具橐韃迎實舍樟亭未幾殺之不淹月而駢爲
畢師鐸所囚實死年七十四贈太保鏐以杜稜守常州
文德元年拔潤州劉浩亡不知所在執朗剖其心祭寶
使阮結守潤州楊行密殺高霸而張郁丁從實皆死初
黃巢平時溥遣小史李師悅上符璽拜湖州刺史昭宗
時遷忠國軍節度使董昌反師悅連和與鏐有隙而結
好于行密安仁義次潤州復助之乾寧三年率子繼徽

代以地附行密其將沈攸謂不可繼徽乃奔揚州陳晟
據睦州十八年死弟詢代立畏鏐忌已因徐綰亂與田
頽通鏐割桐廬隸杭州詢遂絕鏐攻蘭溪鏐使方永珍
擊詢天祐元年行密遣將闕咍陶雅救之執鏐弟鎰大
將王求顧全武等未幾鏐將楊習攻婺州詢乃奔楊渥
渥以金師會守之及鏐破衢州師會走鏐取其地

唐書

陽旻字公素惠元少子

見忠烈

惠元之死被八創墮井以救

得免歷邢州刺史盧從史旻縛潞軍潰有驍卒五千從
史嘗以子視者奔於旻旻閉城不納衆皆哭曰奴失帥
今公有完城又度支錢百萬在府少賜之爲表天子求

旌節旻開諭禍福遣之衆感悟遂還軍憲宗嘉之遷易州刺史王師討吳元濟以唐州刺史提兵深入三百里薄申州外郭殘其垣以功加御史中丞容州西原蠻反授本州經畧招討使擊定之進御史大夫卒贈左散騎常侍

宋

陳思議字後已幽州盧龍人父審確仕後唐至晉歷檀順涿均沁唐祁城八州刺史預征蜀權利州節度終金州防禦使思議初隸莊宗帳下卽位補右班殿直晉天福中改東頭供奉官再遷作坊使安從進叛於襄陽以思

讓爲先鋒右廂都監從武德使焦繼勳領兵進討遇從進之師於唐州花山下急擊大破之從進僅以身免以功領獎州刺史從進平授坊州刺史八年冬契丹謀入寇以思議監澶州軍賜鞍勒馬器帛討楊光遠于青州也又爲行營右廂兵馬都監兵罷改磁州刺史會符彥卿北征契丹思議表求預行未幾改衛州連丁內外艱時武臣罕有執喪禮者思議不俟詔去郡奔喪聞者嘉之起復隨州刺史漢初移淄州罷任歸朝會淮南與朗州馬希萼合兵淮南攻湖南馬希廣來乞師旋屬內難又周祖北征乃分兵令思議往郢州赴援兵未渡而希

廣敗思讓留於郢周祖卽位遣供奉官邢思進召思讓及所部兵還劉崇僭號太原周祖思得方畧之士以備邊遣思讓率兵詣磁州控阨澤潞未幾授磁州刺史充北面兵馬巡檢未行陞磁州爲團練卽以思讓充使廣順元年九月劉崇遣大將李瓌領馬步軍各五都鄉兵十都自團栢軍於鷓子店思讓與都監向訓張仁謙等率龍捷吐渾軍至虎亭西與瓌軍遇殺三百餘人生禽百人獲崇偏將王璠曹海金馬五十匹俄遣王峻援晉州以思讓與康延昭分爲右右廂排陣使令率軍自烏嶺路至絳州與大軍合崇燒營遁去思讓又與藥元福

襲之俄命權知絳州明年春遷絳州防禦使顯德元年九月改亳州防禦使充昭儀軍兵馬鈐轄屢敗并人及契丹援兵遷安國軍節度觀察留後充北面行營馬步軍排陣使五年敗并軍千餘於西山下斬五百級是秋邢州官吏著艾邢銖等四十人詣闕求借留思讓詔褒之十二月改義成軍節度觀察留後六年春世宗將北征命先赴冀州以俟命及得瓦橋關爲雄州命思讓爲都部署率兵戍守世宗不豫還京留思讓爲關南兵馬都部署恭帝嗣位授廣海軍節度宋初加檢校太傅乾德二年又爲保信軍節度時皇子興元尹德昭納思讓

永平府志 卷之十五
女爲夫人開寶二年夏改護國軍節度河中尹七年卒
年七十二贈侍中思議累歷方鎮無敗政然酷信釋氏
所至多禁屠宰奉祿悉以飯僧人目爲陳佛子身沒之
後家無餘財弟思誨至六宅使子欽祚累遷至香藥庫
使長州刺史欽祚子若拙 宋史

陳若拙字敏之幼嗜學思議嘗令持書詣晉邸太宗嘉其
應對詳雅將縻以府職若拙懇辭太平興國五年進士
甲科解褐將作監丞通判鄂州改太子右贊善大夫知
單州以能政就改太常丞遷監察御史充鹽鐵判官益
州繫囚甚衆太宗覽奏訝之召若拙面諭委以疏決遷

殿中侍御史通判益州淳化三年就命爲西川轉運副
使未幾改正使召歸會李至守洛都表若拙佐治改度
支員外郎通判西京留司久之柴禹錫鎮涇州復奏爲
通判遷司封員外郎部送芻糧至塞外優詔獎之入爲
鹽鐵判官轉工部郎中與三司使陳恕不協求徙他局
改主判開拆司車駕北巡命李沆留守東京以若拙爲
判官河決鄆州朝議徙城以避水患命若拙與閻承翰
往規度尋命權京東轉運使因發卒塞王陵口又於齊
州浚導水勢設巨隄於采金山奏免六州所料梢木五
百萬民甚便之河平真授轉運使召還拜刑部郎中知

潭州時三司使缺若拙自謂得之及是大失望因請對
言父母年老不願遠適求納制命上怒謂宰相曰士子
操修必須名寔相副頗聞若拙有能幹特遷秩委以藩
任而貪進擇祿如此往有黃觀者或稱其能選爲西川
轉運使輒訴免當時黜守遠郡今若拙復爾亦須譴降
凡用人豈以親疎爲間苟能盡瘁奉公有所樹立何患
名位之不至也乃追若拙所授告敕黜知處州徙温州
代還復授刑部郎中再爲鹽鐵判官改兵部郎中河東
轉運使賜金紫會親祀汾陰若拙以所部緡帛芻粟十
萬輸河中以助費經度制置使陳堯叟言其幹職擢拜

右諫議大夫徙知永興軍府時鄰郡歲饑前政拒其市
糴若拙至則許貿易民賴以濟又移知鳳翔府入拜給
事中知澶州蝗旱之餘勤於政治郡民列狀乞留天禧
二年卒年六十四錄其子映爲奉禮郎若拙多誕妄寡
學術當時以第二人及第者爲榜眼若拙素無文故目
爲瞎榜云 宋史

遼

張穀一作覺平州義豐人以進士仕至遼興軍節度副使
天祚之走山西也平州軍亂殺其節度使蕭諦里穀撫
安亂者州人推穀領州事秦晉王淳旣死蕭德妃遣時

立愛知平州毅知遼必亡練兵畜馬籍丁壯爲備立愛
至毅弗納金帥粘罕入燕首問平州事于故參知政事
康公弼公弼曰毅狂妄寡謀雖有鄉兵彼何能爲示之
不疑圖之未晚金人招時立愛赴軍前加毅臨海軍節
度使仍知平州旣而又欲以精兵三千先下平州擒毅
公弼曰若加兵是趣之叛也公弼請自往覘之毅謂公
弼曰遼之八路七路已降獨平州未解甲者防蕭幹耳
厚賂公弼而還公弼復粘罕曰彼無足慮金人遂改平
州爲南京加毅試中書門下平章事判留守事金人旣
克燕驅燕之大家東徙以燕空城及涿易檀順景薊州

與宋左企弓康公弼曹勇義虞仲文皆東遷燕民流離
道路不勝其苦入平州言于毅曰宰相左企弓不謀守
燕使吾民流離無所安集公今臨巨鎮握強兵盡忠于
遼必能使我復歸鄉土人心亦惟公是望毅召諸將議
皆曰聞天祚兵勢復振出沒漠南公若仗義勤王奉迎
天祚以圖中興先責左企弓等叛降之罪而誅之盡歸
燕民使復其業而以平州歸宋則宋無不接納平州遂
爲藩鎮矣卽後日金人加兵內用平山之軍外得宋爲
之援又何懼焉毅曰此大事也不可草草翰林學士李
石智而多謀可召與議石至其言與之合乃遣張謙率

五百餘騎傳留守令召宰相左企弓曹勇義樞密使虞仲文參知政事康公弼至灤河西岸遣議事官趙秘校往數其十罪曰天祚播遷夾山不卽奉迎一也勸皇叔秦晉王僭號二也詆訐君父降封湘陰三也天祚遣知閣王有慶來議事而殺之四也檄書始至有迎秦拒湘之議五也不謀守燕而降六也不顧大義臣事于金七也根括燕財取悅于金八也使燕人遷徙失業九也教金人發兵先下平州十也爾有十罪所不容誅企弓等無以對皆縊殺之仍稱保泰三年畫天祚像朝夕謁事必告而後行稱遼官秩榜諭燕人復業恒產爲常

所占者悉還之燕民旣得歸大悅翰林學士李石更名安弼偕故三司使高黨往燕山說宋王安中曰平州帶甲萬餘毅有文武材可用爲屏翰不然將爲肘腋之患安中深然之令安弼與黨詣宋宋主詔帥臣王安中詹度厚加安撫與免三年常賦金閣毋以兵至營州毅與戰于兔耳山大敗之報捷于宋宋建平州爲泰寧軍以毅爲節度使以安弼黨爲徽猷閣待制令宣撫司出銀絹數萬犒賞毅喜遠迎金人謀知舉兵來襲毅不得歸奔燕金人以納叛責宋安撫司索毅王安中諱之索之急斬一人貌類者與之金人曰非毅也以兵來取安中

不得已殺戮函其首送金燕京降將及常勝軍皆泣下
按金史列之叛臣傳穀在遼固不得爲純忠然亦非
金之所得而書叛者舊志采遼史天祚本紀補之頗
當今從之

趙思溫字文美盧龍人少果銳膂力兼人隸燕帥劉仁恭
幕李存勗問罪于燕思溫統偏師拒之流矢中目裂裳
漬血戰猶不已爲存勗將周德威所擒存勗壯而釋其
縛久之日見信用與梁戰於莘縣以驍勇聞授平州刺
史兼平營薊三州都指揮使神冊二年太祖遣大將經
略燕地思溫來降及伐渤海以思溫爲漢軍都團練使

力戰拔扶餘城身被數創太祖親爲調藥太宗卽位以
功擢檢校太保保靜軍節度使天顯十一年唐兵攻太
原石敬瑭遣使求救上命思溫自嵐憲間出兵援之旣
罷兵改南京留守盧龍軍節度使管內觀察處置等使
開府儀同三司兼侍中賜協謀靜亂翊聖功臣尋改臨
海軍節度使會同初從耶律牒螭使晉行冊禮還加檢
校太師二年有星隕于庭卒上遣使賻祭贈太師魏國
公子延昭延靖官至使相

遼史

金

孟浩字浩然灤州人遼末年登進士第天會三年爲樞密

院令史除平州觀察判官天眷初選入元帥府備任使
承制除歸德少尹充行臺吏禮部郎中入爲戶部員外
郎郎中韓企先爲相拔擢一時賢能皆置機要浩與田
穀皆在尙書省穀爲吏部侍郎浩爲左司員外郎旣典
選善銓量人物分別賢否所引用皆君子而蔡松年曹
望之許霖皆小人求與穀相結穀薄其爲人拒之松年
初事宗弼于行臺省以微巧得宗弼意宗弼當國引爲
刑部員外郎望之爲尙書省都事霖爲省令史皆怨穀
等毀之於宗弼凡與穀善者皆指以爲朋黨企先薨穀
爲橫海軍節度使選人龔夷鑒除名值赦赴吏部銓

得預覃恩穀已除橫海部吏以夷鑒白穀穀乃例用月
日署之許霖在省典覃恩行臺省工部員外郎張子周
素與穀有怨以事至京師微知夷鑒覃恩事嗾許霖發
之詆以專擅朝政詔獄鞫之擬穀與奚毅邢具瞻王植
高鳳庭王劬趙益興龔夷鑒死其妻子及所往來孟浩
等三十四人皆徙海上仍不以赦原天下寃之世宗在
熙宗時知田穀黨事皆松年構成之而浩等三十二人
遇天德赦令還鄉里多物故惟浩與穀兄穀王補馮煦
王中安在大定二年召見復官爵浩爲侍御史穀爲大
理丞補爲工部員外郎煦爲兵部主事中安知火山軍

事而浩尋復爲右司員外郎浩篤寔遇事輒言無所隱
上嘉其忠每對大臣稱之有疾求外補除祁州刺史致
仕歸七年起爲御史中丞而浩已年老世宗以不次用
之再閱月拜叅知政事故事無自中丞拜執政者浩辭
曰不次之恩非臣所敢當上曰國家用人豈拘階次卿
公正忠勤雖年高猶可宣力數年朕思之久矣浩頓首
謝世宗勅有司東宮涼樓增建殿位浩諫曰皇太子義
兼臣子若所居與至尊宮室相伴恐制度未宜固宜示
以儉德上曰善遂罷其役因謂太子曰朕思漢文純儉
心常慕之汝亦可以爲則也未幾上宴羣臣於東宮以

大玉杓黃金五百兩賜丞相顧謂羣臣曰卿等能立功
朕亦褒賞如此又曰叅政孟浩公正敢言自中丞爲執
政卿等能如是朕亦不次用之上謂宰臣曰宋前廢帝
呼其叔湘東王爲豬王食之以牢納之泥中以爲戲笑
書於史策所以勸善而懲惡也海陵以近習掌記注記
注不明當時行事寔錄不載衆人共知之者求訪書之
浩對曰良史直筆君舉必書帝王不自觀史記注之臣
乃得盡其直筆浩復奏曰歷古以來不明賞罰而能治
者未之聞也國家賞善罰惡蓋亦多矣而天下莫能知
乞自今凡賞功罰罪皆具事狀頒告之使君子知勸以

遷善小人知懼以自警從之進尚書右丞兼太子少傅
爲真定尹上曰卿年雖老精神不衰善治軍民毋遽言
退以通犀帶賜之十三年薨

金史

畧節

李杭樂亭人天會初登進士時平灤兵戈甫定民未知學
公擇城南隅剏建文廟行釋奠禮以振興學校維持風
俗爲已任仕至刺史有聲于時

縣志

劉敏行平州人登天會三年進士除太子校書郎累遷肥
鄉令歲大饑盜賊掠人爲食諸縣老弱人保郡城不敢
耕種農事廢畝畝荒蕪敏行白州借軍士三十護縣民
出耕多張旗幟爲疑兵敏行率軍巡邏日暮則閱民入

城由是盜不敢犯而耕稼滋殖轉高平令縣城圯壞久
不修大盜橫恣掠縣鎮不能禦敏行出已俸率寮吏出
錢僱役繕治百姓欣然從之凡用二千人版築遂完鄉
村百姓入保賊至不能犯九遷爲河北東路轉運使致
仕卒

金史

趙興祥平州盧龍人六世祖思溫遼燕京留守封天水郡
王父瑾遼靜江軍節度使興祥以父任閣門祇候謁告
省親於白霄會遼季土賊據郡作亂興祥攜母及弟妹
奔燕京不能進乃自柳城涉沙磧夜視星斗而行僅達
遼軍而不知遼主所向遂還柳城及婁室獲遼主興祥

乃歸國從宗望伐宋爲六宅使天眷初累官同知宣徽院事母憂去官熙宗素聞興祥孝行及英悼太子受册以本官起復護視太子轉右宣徽使天德初改左宣徽使海陵嘗問興祥欲使子弟爲官當自言興祥辭謝海陵善之賜以玉帶詔曰汝官雖未至一品可佩此侍立爲濟南尹賜車馬金幣金銀器皿改絳陽軍節度使召爲太子少保封廣平郡王改鉅鹿正隆初例奪王爵遷太子少傅封申國公起爲定武軍節度使海陵伐宋興祥二子從軍世宗卽位海陵尙在淮南二子未得還興祥來見於平州世宗嘉其誠欵以爲秘書監復爲左宣

徽使上曰尙食庖人猥多徒費廩祿朕在藩邸時家務皆委執事者自卽位以來事皆留心俸祿出於百姓不可妄費庖人可約量損減近臣獻琵琶世宗却之謂興祥曰朕憂勞天下未嘗以聲技爲心自今勿復有獻宜悉諭朕意有司奏南北邊事未息恐財用未給乞罷修神龍殿涼位工役上卽日使興祥傳詔罷之久之以其孫珣爲閣門祗候十五年上幸安州春水召興祥赴萬春節上謁于良鄉賜銀五百兩感風眩賜醫藥未幾卒

金史

張景仁字壽甫遼西人累官翰林待制貞元二年與翟永

固俱試禮部進士以尊祖配天爲賦題忤海陵旨語在
永固傳大定二年僕散忠義伐宋景仁掌其文辭宋人
議和朝廷已改奉表爲國書稱臣爲姪但不肯世稱姪
國往復凡七書然後定其書皆景仁爲之世宗稱其能
嘗曰今之文章如張景仁與宋人往復書指事達意辨
而裁真能文之士也五年罷兵入爲翰林直學士七年
選侍講八年爲詳讀官宋國書中有寶鄰字景仁奏鄰
字太涉平易上問累年國書有鄰字否命一一校勘六
年書中亦有之上責問六年詳讀官劉仲淵右丞石琚
亦請罪曰臣嘗預六年詳讀上曰此有司之過安得一

一責宰臣邪詔有司就論宋臣王滹使歸告其主後曰
國書不得復爾仲淵時爲禮部侍郎降石州刺史景仁
遷翰林學士兼同修國史久之上召景仁讀陳言文字
上問事欵幾何景仁率易少周密對曰二十餘事復曰
其中如某事某事十事可行餘皆無謂也明日上召景
仁責之曰卿昨言可行者朕觀之中復有不可行者卿
謂無謂者中亦有可行者朕未嘗使卿分別可否卿輒
專可否何也自今戒之十年兼太常卿學士同修國史
如故轉承旨兼修國史改河南尹二十一年召爲御史
大夫仍兼承旨修國史世宗謂景仁曰卿博學老儒求

如古之御史大夫然後行之斯爲稱矣不能如古之人
衆人不獨謂卿亦謂朕不能知人卿醉中頗輕脫失言
當以酒爲戒初朝臣言景仁有文藝而頗率易不可任
臺察景仁被詔就臺中治監察罪輒以便服視決罰上
聞之責景仁曰朕初用卿爲大夫或言卿不可居此官
今果不爲故事率易如此卿自慎不然黜罰及矣景仁
頓首謝未幾詔葬元妃李氏于海王莊平章政事烏古
論元忠提控葬事都水監丞高杲壽治道路不如式元
忠不奏決之四十景仁劾奏元忠輒斷六品官無人臣
禮上曰卿劾奏甚當使左宣徽使蒲察鼎壽傳詔戒勅

元忠曰監丞六品有罪聞奉今乃一切趨辦擅決六品
官法當如是耶御史在尊朝廷汝當自咎勿復再元忠
尚豫國公主怙寵自任倨慢朝士景仁劾之朝廷肅然
是歲薨

金史

李元璋字寶臣灤州人詞賦進士元道之弟少穎悟每數
千言一覽成誦未弱冠登正隆元年律科上第任西北
路招討知法有能名陞左三品校法歷石城主簿豐潤
縣丞夏津令泰和間訪山東吏材能者璋爲第一章宗
特旨宣問璋奏正紀綱近忠直遠邪佞數事上嘉納之
擢吏部尚書官至少中大夫上護軍府隴西郡開國侯

食邑二千戶實封一百戶賜紫金魚袋元璋事父母甚
謹公餘拱立父側命退乃退温清覲省曲盡其禮鄉邦
稱之

趙思文平州人累官至禮部尙書時朝廷多難思文在間
關羈旅中未嘗墮于非禮時人稱之

張僅言幼名元奴穀之子也宗望攻下平州僅言在襁褓
間里人劉承宣得之養於家其鄰韓夫人甚愛之年數
歲隨韓夫人得見貞懿皇后留之藩邸稍長侍世宗讀
書遂使僅言主家事繩檢部曲一府憚之世宗留守東
京海陵用兵江淮將士往往亡歸詣東京願推戴世宗

爲天子僅言勸進世宗卽位除內藏庫副使權發遣宮
籍監事海陵死揚州僅言與禮部尙書烏居仁殿前左
衛將軍阿虎帶御院通進劉琬發遣六宮百司圖書府
藏在南京者還以本職提控尙食局轉少府監丞仍主
內藏僅言能心計世宗倚任之凡宮室營造府庫出納
行幸頓舍皆委之世宗嘗曰一經僅言無不愜朕意者
六年提舉修內役事役夫掘地得金匿之事覺法當死
僅言責取其物與官釋其罪尋兼祇應司遷少府監提
控宮籍監祇應司如故護作太寧宮引宮左流泉溉田
歲護稻萬斛十七年復提點內藏典領昭德皇后山陵

遷勸農使諸職如故僅言雖舊臣然世宗終不假以權
任嘗欲以爲橫海軍節度使而不可去左右遂止及得
疾猶扶杖視事疾亟詔太醫診視近侍問訊相屬及卒
上深惜之遣官致祭賻銀五百兩重綵十端絹二百疋
棺槨衣衾銀汞斂物墓地皆官給贈輔上將軍

元

張昇字伯高其先定州人後徙平州昇幼警敏過人學語
時輒能辨字音應對異於常見既長力學工文辭至元
二十九年用薦者授將仕郎翰林國史院編修官預修
世祖寔錄陞應奉翰林文字尋陞修撰歷典文署令遷

太常博士成宗崩大臣承中旨議奉徽號饗宗廟昇曰
在故典凡有事于宗廟必書嗣皇帝名今將何書議遂
寢武宗卽位議躬祀禮昇據經引古參酌時宜以對帝
嘉納之至大初改太常寺爲太常禮儀院卽除昇爲判
官久之外補知汝寧府民有告寄柬書於其家者踰三
年取閱有禁書一編且記里中大家姓名于上昇亟呼
吏焚其書曰妄言誣民且再更赦矣勿論同列懼皆引
起旣而事聞廷議謂昇脫姦軌遣使窮問卒無跡可指
乃詰以擅焚書狀昇對曰事固類姦軌然昇備位郡守
爲民父母今斥誣訴免冤濫雖重得罪不避乃坐奪俸

二月旁郡移文報吳人侯君遠者言歲直壬子六月朔日蝕其占爲兵寇歲癸丑其應在吳分野同列欲召屬縣爲備禦計昇曰此訛言久當自息毋用惑民聽斥其無稽衆論韙之部使者譽治行爲諸郡最歷江西行省左右司郎中除紹衣路總管初大德至大間越大饑且疫癘民死者殆半賦稅鹽課責里胥代納吏並緣爲姦害富家昇爲証于簿籍白行省蠲之前守有爲江淞行省叅知政事者爭代者祿米有隙欲內之罪移平江歲輸海運糧布囊二萬俾紹興製如數民患苦之不能堪更數守謂歲例如此置弗問昇言麻非越土所生海漕

寔吳郡事於越無與章上卒罷之昇旣謹於繩吏又果於去民瘼故人心悅服歷湖北道廉訪使江南行臺治書侍御史召爲叅議中書省事改樞密院判官尋復中書叅議至治二年又出爲河東道廉訪使未行拜治書侍御史明年出爲淮西道廉訪使泰定二年拜陝西行省叅知政事加中奉大夫尋遷遼東道廉訪使屬永平大水民多損瘠昇請發海道糧十八萬石鈔五萬緡以賑饑民且蠲其歲賦朝廷從之民得全活者衆明年召拜侍御史天歷初出爲山東道廉訪使時方有警有司請完城以爲備昇曰民恃吾以生完城是棄民也由是

元平府志 卷之二十五
民皆安之文宗賜尙醞文幣以賞其功踰年召爲太禧院副使兼奉贊神御殿事除河南省左丞復遷淮西道廉訪使昇時年六十有九上書乞致仕至順二年復起爲集賢侍講學士文宗眷待之意甚隆元統元年順帝卽位首詔在廷耆艾訪問治道昇條上時所宜先者十事尋兼經筵官廷試進士特命昇讀卷事已告省先墓帝賜金織文袍以寵其歸明年以至章閣大學士資善大夫知經筵事召賜上尊趣就職昇以疾辭帝察其不可強許之尋命本郡月給祿半以終其身至正元年卒年八十一贈資德大夫河南等處行中書省左丞謚文

憲
元史

鮮于仲權其先遼東人遠祖輔仕魏任漁陽太守有功封亭侯後還本鎮子孫遂家漁陽北平間仲權世居樂亭少博學工古文辭登金明昌間進士先是文廟創自天會無黌舍規模粗具仲權慨然謀鼎建邑人相勸興置學館人物稱盛自茲始仲權爲人重道義有節概弟仲畢官昭信校尉

縣志

陳顥字仲明其先居盧龍有名山者仕金爲謀克監軍太祖得之以爲平陽等路軍民都元帥子孫徙清州遂爲清州人顥穎悟日記誦千百言稍長游京師登翰林承

旨王磐安藏之門磐熟金典章安藏通諸國語顯兼習之安藏乃薦顯入宿衛尋爲仁宗潛邸說書于是仁宗奉母后出居懷慶顯從行日開陳以古聖賢居艱貞之道會成宗崩仁宗入定內難以迎武宗顯皆預謀及仁宗卽位以推戴舊勳特拜集賢大學士榮祿大夫仍宿衛禁中政事無不與聞科舉之行顯贊助之力尤多顯時伺帝燕閒輒取聖經所載大經大法有切治體者陳之每見嘉納帝嘗坐便殿群臣入奏事望見顯喜曰陳仲明在列所奏必善事矣顯以父年老力請歸養清州帝特命顯長子孝伯爲知州以就養顯固辭乃以孝伯

爲州判官帝欲用顯爲中書平章政事顯叩首謝曰臣無汗馬之功又乏經濟之畧一旦置之政塗徒速臣咎臣願得朝夕左右獻替可否庶少裨萬一亦以全臣愚忠帝乃允仁宗崩辭祿家居者十年文宗卽位復起爲集賢大學士上疏勸帝大興文治增國子學弟子員蠲儒生徭役文宗皆嘉納焉顯先後居集賢署薦士牘累數百有訐之者顯曰吾寧以謬舉受罰蔽賢誠所不忍順帝元統初顯扈蹕行幸上都至龍虎臺帝命造膝前而握其手曰卿累朝老臣更事多矣凡議政事宜極言無隱顯頓首謝不敏顯每集議其言無不剴切後至元

四年致政命食全俸于家明年卒年七十六至正十四年贈摠誠秉義佐理功臣光祿大夫河南江北等處行中書省平章政事柱國追封薊國公諡文忠顯出入禁闈數十年樂談人善而惡聞人過大夫士因其薦拔以至顯列有終身莫知所自者是以結知人主上下無有惡尤歐陽元爲國子祭酒與顯同考試國子伴讀每出一卷顯必拾而觀之苟得其片言善卽以寘選列爲之色喜元歎曰陳公之心蓋篤于仁而踰于厚者真可使鄙夫寬薄夫敦矣次子敬伯至正中仕爲中書參知政事歷左丞右丞二十七年拜中書平章政事

元史

趙炳字彥明惠州灤陽人父宏有勇畧階至奉國上將軍炳幼失怙恃鞠於從兄歲饑往平州就食遇盜欲殺之兄解衣就縛炳年十二立請代兄盜驚異舍之而去甫弱冠以勲閥之子侍世祖於潛邸恪勤不怠遂蒙眷遇世祖次桓撫間以炳爲撫州長城邑規制爲之一新已未王師伐宋未幾北方有警括兵斂財燕薊騷動王師北還炳遠迓中途具以事聞追所括兵及橫斂財物悉歸于民世祖嘉其忠中統元年命判北京宣撫司事北京控制遼東番夷雜處號稱難治時參知政事楊果爲宣撫使聞炳至喜曰吾屬無憂矣三年括北京鷹坊等

戶丁爲兵蠲其賦令炳總之時李瓊叛據濟南炳請討之國兵圍城炳將千人獨當北面有所俘獲卽縱遣去曰脅從之徒不足治也濟南平入爲刑部侍郎兼中書省斷事官時有攜妓登龍舟者卽按之以法未幾其人死其子犯蹕訖寃詔讓之炳曰臣執法尊君職當爲也帝怒命之出旣而謂侍臣曰炳用法太峻然非徇情者改樞密院斷事官濟南妖民作亂賜金虎符加昭勇大將軍濟南路總管炳至止罪首惡餘黨解散歲凶發廩賑民而後以聞朝廷不之罪也遷遼東提刑按察使遼東聞其來豪猾屏跡至元九年帝念關中重地風俗強

悍思得剛鯁舊臣以臨之授炳京兆路總管兼府尹皇子安西王開府于秦詔治宮室悉聽炳裁製王府吏卒橫暴擾民者卽建白繩以法王命之曰後有犯者勿復啟請若自處之自是豪猾斂戢秦民以安有旨以解州鹽賦給王府經費歲久積逋二十餘萬緡有司追理僅獲三之一民已不堪炳密啟王免之會王北伐詔以京兆一年之賦充軍資炳復請曰所徵逋課足佐軍用可貸歲賦以蘇民力令下秦民大悅十四年加鎮國上將軍安西王相王府冬居京兆夏徙六盤山歲以爲常王北伐六盤守者搆亂炳自京兆率兵往捕甫及再旬元

惡授首十五年春六盤再亂復討平之王還自北嘉賞
戰功賚賜有加是歲十一月王薨十六年秋被旨入見
便殿帝勞之曰卿去數載衰白若此關中事煩可知已
詢及民間利病炳悉陳之因言王薨之後運使郭琮郎
中郭叔雲竊弄威柄恣爲不法帝聞大怒改炳中奉大
夫安西王相兼陝西五路西蜀四川課程屯田事餘職
如故卽令乘傳偕勅使數人往按琮等至則琮假嗣王
旨入炳罪收炳妻孥囚之時嗣王之六盤徙炳等于平
涼北崆峒山囚閉益嚴炳子仁榮訴于王詔近侍二人
馳駟而西脫炳且械琮黨偕來琮等留使者醉以酒先

遣人毒炳于平涼獄中其夜星隕有聲如雷年五十九
時十七年三月也帝聞之撫髀嘆曰失我良臣俄械琮
百餘人至帝親鞫問盡得其情旣各伏辜命仁榮手刃
琮叔雲于東城籍其家以付仁榮仁榮曰不共戴天之
人所蓄之物何忍受之帝嘉之別賜鈔二萬二千五百
緡爲治喪事國朝舊制無賻臣下禮蓋殊恩也六月詔
雪炳寃特贈中書左丞謚忠愍子六人仁顯早亡仁表
仁榮仁旭仁舉仁軌仁榮仕至中書平章政事仁舉登
至元中進士知晉州餘俱登顯仕

元史

張晉宋橫渠五世孫歷官睢州防禦使太宗六年賜第于

燕并食邑于灤見灤北有橫山追思其祖榜曰橫雲清
逸築橫渠書院于東南隅弟智為王府參謀

崔煜遷安人事親以孝聞至正中任遼陽行省郎中程思
忠作亂據永平剽掠鄉民煜領兵保障之後官至參政

永平府志卷之十一

人物志二

列傳中

明

宋宏道樂亭人少值元季隱居不仕講授鄉里家業泊如

恬不為意後明興設科登洪武乙丑進士拜監察御史
有聲尋遷河南左參政以衰老乞歸槩書衣裝惟一輓

輅而已後起左僉都御史未就年七十餘卒於家

縣志

溫原樂亭人洪武中薦辟入仕歷職勤能官至左僉都御

史有聲載一統志

李樂樂亭人洪武中貢入太學永樂間拜監察御史有激揚聲遷山東按察司副使卒後有行部者至詢樂得其子茂貧甚捐俸助之俾就塾則其品望可見矣茂正統間貢仕至高郵州知州茂子珏成化間貢任州判

王翺字九臯鹽山人永樂十三年初會試貢士於行在帝時欲定都北京思得北士用之翺兩試皆上第大喜特召賜食改庶吉士授大理寺左寺正左遷行人宣德元年以楊士奇薦擢御史時官吏有罪不問重輕許運磚還職翺請犯贓吏但許贖罪不得復官以懲貪黷帝從之五年巡按四川松潘蠻竊發都督陳懷駐成都相去

八百餘里不能制翺上便宜五事請移懷松潘而松茂軍糧於農隙齊力起運護以官軍毋專累百姓致被劫掠吏不給由爲民蠹令自首毋隱州縣土司徧設社學會川銀場歲運米八千餘石給軍往返勞費請令有罪者納粟自贖詔所司議詳運糧事而遷蠹吏北京餘悉允行英宗卽位廷議遣文武大臣出鎮守擢翺右僉都御史偕都督武興鎮江西懲貪抑奸吏民畏愛正統二年召還院四年處州賊流劫廣信命翺往捕盡俘以還是年冬松潘都指揮趙諒誘執國師商巴掠其財與同官趙得誣以叛其弟小商巴怒聚衆剽掠命翺及都督

李安軍二萬征之而巡按御史白其枉詔審機進止翱
至出商巴于獄遣人招其弟撫定餘黨而劾誅諒戍得
復商巴國師松潘遂平六年代陳鑑鎮陝西軍民之借
糧不能償者覈免之七年冬提督遼東軍務翱以軍令
久弛寇至將士不力戰因諸將廷謁責以失律罪命左
右曳出斬之皆惶恐叩頭願効死贖翱乃躬行邊起山
海關抵開原繕城垣濬溝塹五里爲堡十里爲屯使烽
燧相接練將士室鰥寡軍民大悅又以邊塞孤遠軍餉
匱緣俗立法令有罪得收贖十餘年間得穀及牛羊數
十萬邊用以饒八年以九載滿進右副都御史指揮孫

璟鞭殺戍卒其妻女哭之亦死他卒訐璟殺一家三人
翱曰卒死法妻死夫死父非殺也命璟償其家薨葬
費璟感激後參將遼東追敵三百里事李秉爲名將十
二年與總兵曹義等出塞擊兀良哈擒斬百餘人獲畜
產四千六百進右都御史十四年諸將破敵廣平山進
左脫脫不花大舉犯廣寧翱方閱兵寇猝至衆潰翱入
城自保或謂城不可守翱手劍曰敢言棄城者斬寇退
坐停俸半載景泰三年召還掌院事易儲加太子太保
溥梧猺亂總兵董興武毅推委不任事于謙請以翁信
陳旺易之而特遣一大臣督軍務乃以命翱兩廣有總

督自翽始翽至鎮將吏讐服推誠撫諭徭人向化部內
無事明年召入爲吏部尙書初何文淵協王直掌銓多
私爲言官攻去翽代一循成憲天順改元直致仕翽始
專部事石亨欲去翽翽乞休已得請李賢力爭乃留及
賢爲亨所逐亦以翽言留兩人相得歡甚帝每用人必
咨賢賢以推翽以是翽得行其志帝眷翽厚時召對便
殿稱先生不名而翽年幾八十多忘嘗令郎談論隨入
帝問故翽頓首曰臣老矣所聆聖諭恐遺悞令此郎代
識之其人誠謹可信也帝喜吏部主事曹恂已遷江西
參議遇疾還翽以聞命以主事回籍恂伺翽入朝捧

翽胸摑其面大聲詬詈事聞下詔獄翽具言恂寔病得
斥歸時服其量五年加太子少保成化元年進太子太
保雨雪免朝參屢疏乞歸輒慰留數遣醫視疾三年疾
甚乃許致仕未出都卒年八十有四贈太保諡忠肅翽
在銓部謝絕請謁公餘恒宿直廬非歲時朔望謁先祠
未嘗私歸第每引選或值召對侍郎代選歸雖暮必至
署閱所選惟恐有不當也論薦不使人知曰吏部豈快
恩怨地耶自奉儉素景帝知其貧爲治第鹽山孫以廕
入太學不使應舉曰勿妨寒士路壻賈傑官近畿翽夫
人數迎女傑恚曰若翁典銓移我官京師反手爾何往

來不憚煩也夫人聞之乘間請翔翔怒推案擊夫人傷面傑卒不得調其自遼東還朝也中官同事者重翔贐明珠數顆翔固辭其人曰此先朝賜也公得毋以贓卻我乎不得已納而藏焉中官死召其從子還之爲都御史時夫人爲娶一妾逾半歲語翔翔怒曰汝何破我家法卽日具金幣返之妾終不嫁曰豈有大臣妾嫁他人者翔卒妾往奔喪其子養之終身李賢常語人曰臯陶言九德王公有其五亂而敬擾而毅簡而廉剛而塞強而義也然性頗執嘗有詔舉賢良方正經明行修及山林隱逸士至者率下部試翔黜落百不取一二性不喜

南士英宗嘗言北人文雅不及南人顧質直雄偉緩急當得力翔由是益多引北人晚年徇中官郭聰囑爲都御史李秉所劾翔自引伏蓋不無小損云子孫世官錦

衣千戶

明史

按王忠肅本灤州人入鹽山籍今從灤志載之

王銳遷安人正統己未進士由知縣歷官都御史任事有擔當不爲勢怵巡撫延綏值叛兵構亂銳率衆討平之敘功廕子世襲錦衣衛百戶

趙玉遷安人正統甲子舉人初知山東高唐州陞漢中知府並著治績致仕居家十年平心率物鄉人推重焉祀

鄉賢

史怡樂亭人永樂甲申貢入太學時遼軍亂入關怡守城有功授戶部郎中歷任江西左參政載明一統志

劉宣江西吉安人成盧龍衛以春秋應景泰元年鄉試侍講劉鉉主考定爲第一人同考者欲更其次鉉爭曰朝廷立賢無方不可乃止次年殿試第二甲授編修累官至南京工部尙書名德爲時所推重

杜謙字益之昌黎人幼失恃事繼母甚謹不拂父意登景泰進士授主事以姚夔薦出爲浙江布政司入尹京兆拜工部侍郎致仕歸謙居官善理事平易明決民懷吏

畏時定賦役等第按察使欲增損其則而盡貸無產之家謙以此輩皆游民而令賦役獨歸力穡之農非重本抑末之意卒從謙議歲祿特奏免田租若干舊有起運存留之數戶部以起運者不可免而止免存留者謙言若然則一省官俸軍餉俱乏矣二者必增損之乃可執奏不已朝廷從之子源亦第進士官至青州府知府

陳恕字達道灤州人景泰舉人仕至開封府同知折獄立斷吏不敢近案一語河汴屢決請發帑羨躬督築塞保全腴田數百頃考滿乞歸送者塞路行李蕭索有司重其廉有贈遺卽市鐵鑄文廟祭器居鄉謹厚喜怒不形

恤災贍孤以純德稱

畿輔通志

唐福東勝左衛世襲指揮中景泰庚午舉人孝友慕義歷知隨濱通三州有清白聲嘗鑄祭器以供聖祀加四品服俸九年考滿陞萊州知府未任卒祀鄉賢

盧龍縣志

周斌昌黎人登景泰辛未進士授御史劾忠國公石亨曹吉祥諸不法事調江陰知縣多惠政擢開封知府未幾轉陝西參政軍民遮道攀留白於提學副使劉昌記其遺愛立石頌德官至湖廣布政使

閻鼎字仲輔灤州人登景泰甲戌進士授監察御史巡按兩浙劾權橫清鹽鑛風紀甚嚴人以閻羅目之謫廣西

平南主簿陞山東諸城知縣操履一致卒于官著有道菴集祀鄉賢

萬信昌黎人以明經任開封府知府有異政祀鄉賢載明一統志

張泰樂亭人景泰間貢入太學授桐鄉知縣時桐鄉新闢諸所未備泰至經營三載六事修舉民不告勞俗多水火葬泰禁之購地置義塚他如闢茅塞覈兼并招商買皆可紀焉九年薦有成績陞開封府通判見桐鄉志

牛本樂亭人景泰丙子舉人授九江府同知素性謙恭涖官廉慎有惠政九年將代郡人赴部保留擢本府知府

王貴昌黎人以明經授蘇州郡丞陞慶陽知府有德望祀鄉賢

盧敬其先山陽人徙定州元時又徙樂亭高祖和甫致和間聞于鄉父斌生敬嗜學領成化乙酉鄉薦授兵部司務侃侃不阿冰操凜著五載考最進階嘗語其子梁棐輩曰世有營利者爲子孫計耳竟何益吾厄一第子孫必有第者若曹勉之丁外艱卒家業蕭然仲子梁歲貢不仕以子貴封右參議

鄭巳字克修山海衛人天性穎敏成童充邑弟子員屬儷句輒驚人其甚窘刻意向學寒夜燃薪誦書達旦用是博極羣書登成化丙戌進士選庶吉士時劉文安公典教習每閱巳文歎曰山海乃有此子改監察御史會廷推撫臣弗當抗章論之又累疏指摘輔臣及中貴由此人多忌巳者巡按陝西值甘涼災沴邊境驛騷乃上匡時圖治等疏得舉賑濟飭邊備時有勲貴親弟怙勢凌下監司莫敢問捕而杖之幾死竟被累謫戍宣府其鎮總戎雅敬巳館諸佛宮士人受學者日衆有黠卒怨總戎誣以不道事累巳繫闕下上白其誣放歸孝宗踐祚詔復其官巳亮節有氣嫉惡如仇家居時談世事不平

者輒攘臂憤惋至面詰人罔避以是弗亨于官云

張廷綱字朝振永平衛人登成化壬辰進士授行人賜一品服使安南回太監汪直執送西廠獄未幾廠革各散去罷歸纂府志

郝隆字景昌自汴徙灤中成化壬辰進士初官大理評事歷左寺副右寺正時江南有大獄逮者及萬人公奉命往勘立決擢金華知府爲政寬平積穀數萬石備荒通濟橋燬奮力修之在任九載致仕歸進階亞中大夫灤

州志

蕭顯字文明別號海釣山海衛人登成化壬辰進士授兵

科給事中有武臣連中貴張大邊功希重賞顯批奏尾駁之直聲振一時會巫矯邪神煽惑復抗章劾之並請禁私創庵觀言極剴切留中不報一日召至左順門命中官面詰顯氣定語暢應對了了乃諭遣之又數日巫逐矣權倖愈疾顯居省中八年外遷鎮寧同知命下顯方對客作草書手閱報付其子趣治裝仍終數紙乃罷涖鎮寧八年復遷衢州府同知又三年擢福建僉事所至皆盡心職業無厭薄意隨賈萬壽表入賀時刑部尙書白昂欲有所薦戚友亦樂爲之援不復顧戀竟乞休歸顯性醇篤不妄言笑尙義氣久而弗渝所著有海釣

集鎮寧行稿其書法沉着頓挫傳播朝鮮珍重之

謝綱字廷憲灤州人登成化壬辰進士素以孝友稱任上虞知縣治政慈祥明決有質者一判兩服卒于官民皆望柩而哭祀鄉賢

李時其先鳳陽人有御史公謫爲盧龍民子從義以靖難功爲永平衛中所試百戶五世至凱凱生時父產悉讓諸兄獨養老母中成化丁酉舉人知岢嵐州八年廉平多惠政民俗因財退婚曲爲解諭完聚吏卒鰥者捐俸備禮以配之論財之俗爲變陞漢中府同知在任六年陞知平涼府持守不渝忤逆瑾改思州府又誣以前任庫藏不明落職追問踰年乃白稱恩恩軍民府行至南寧中瘴癘卒于塗二子充濁充拙

王和遷安人登成化戊戌進士歷南北道御史論劾戶部尚書張鳳西廠太監汪直聲動朝野外轉山東海道副使巡海中瘴卒于官生平廉介剛直卒之日貧不能殮同官爲哀金致賻始得歸葬祀鄉賢

魏字潤之灤州人登成化戊戌進士性方嚴謙退篤孝友耽墳典試南官不第進太學聞見閎肆及登第尹臨邑勤政廣積值歲大祲民多濟活暇卽試士請業門下者多登仕籍焉三載政成遂罹疾卒時囊無數金幾不

能殮祀鄉賢

馮清字士潔灤州人親喪廬墓三年手植松栢百餘株踰年繁茂里人歎異登成化癸卯鄉薦爲郿縣令慈義兼施獄有冤囚力爲詳豁後持金馬以酬揮之不受曰滌爾冤者國恩也何謝時以廉孝先生稱之

郭鏞遷安人登成化甲辰進士授金華推官平反詳允郡無冤獄倡修通濟橋用資利涉考選授御史巡按宣大遼東糾劾權貴綽有直聲轉山西副使督修邊墻節省糧耗軍民稱便勞瘁卒于官時稱清介崇祀鄉賢

高謙字天益灤州人登宏治癸丑進士性剛直不苟父早卒力本勤學事母不曠定省撫弟詳甚友愛初拜丹陽令邑庠隘乃拓學基崇殿廡講授經術又建津梁創倉宇議賑貸百度維新士人勒碑頌之陞青州同知轉刑部郎中陞平涼知府未幾調鞏昌逾月而卒祀鄉賢

李金遷安人宏治進士官戶部員外郎有貴戚誣占民田勘寔歸田於民孝廟奇之書名殿壁擢知德安府賑饑節冗白疑獄平劇盜周濂等以神明稱歷任山東副使道次子涵官布政使

畿輔通志

王春撫寧人登宏治丙辰進士授翰林院檢討侍壽王講出邸遷春左長史日以善道開悟有所陳對必云尊天

子守祖宗法度孝宗嘉之賜正四品服庚申改周府左
長史王在幼冲啟迪如在壽邸將婚汴之巨室有賄謀
爲元妃者春發其奸別選當嗣爵庶兄託內使行金錢
于春謀奪嫡春正色叱之遂寢乙亥王以春輔道勤勞
奏加三品服庚寅力求去嘉靖丙申卒

任惠字濟民灤州人登宏治丙辰進士授行人兩使周藩
考績有聲遷南京吏科給事中以彈劾太監高鳳革爲
民後起山東僉事未任卒崇祀鄉賢

王蕃字邦憲灤州人登宏治丙辰進士由博士陞御史立
朝謇諤不容人過嘗劾逆瑾彈媚臣陳晦等專勅切責

移疾歸里幾數十年起守平涼又以中忤罷歸有雪崖
詩集

朱鑑字緝熙其先揚州海門人永樂二年遣富戶實北邊
遂僑居盧龍之北鄉從遷者八戶因名其地曰八家寨
始祖自名再傳至善生有卽鑑父天性孝友坦直積粟
三千斛嘗貸嫻隣不取息鑑登宏治己未進士授刑部
主事正德中劉瑾擅政舉朝獻媚者十之九鑑處之坦
然正直不阿陞員外郎中出爲建寧知府居官嚴明果
斷不受囑託郡人有神明之頌以母憂歸服闋補青州
府知府在任五載其治如建寧致政還家村居不事交

接居左建一小樓門前有井婦女非裙裳不敢至井汲
水里中皆以禮自制嚴憚之如王彥方云子三伊廩生
似早卒侶以貢生爲肥城訓導

李炫遷安人幼而好學冬夏兀坐一室登宏治己未進士
歷甘肅行僕卿河西叛將煽亂炫匿民舍中示方畧而
戢之事平誣執甚衆炫讞鞠多全活致政二紀課子耕
讀足不至官府

王珣字汝溫永平衛人登宏治己未進士授兵科給事中
督工泰陵中使董役者剝削軍士伐近陵山木代薪以
規利劾之伏辜陞工科左給事中徽州有豪族爭訟數

年不決命勘遂得情改御史覈應天諸郡公藏知府某
不職懼得罪密以金餽卽發其贓私罷之陞刑科都給
事中武宗鋪宮奏省費數千金以濟邊餉陞順天府丞
歲荒餓殍載途竭力賑活甚衆陞都察院左僉都御史
提督雁門等關兼巡撫山西裁宗室驕橫以法權要規
鹽利者峻拒之闔境肅然會敵分路入寇督兵禦之寧
武關將吏以逗留失利劾其罪械繫京師因自劾并三
邊撫臣俱左遷尋降浙江左叅議豪民有匿租數十載
躬履畝得數百頃爲公稅孝豐有作亂者遠近騷然衆
議調兵勦之請先往至卽解散陞河南右叅政分守南

陽捕浙川礦賊乃別脅從若干值盛寒多凍餒死悉活以粥遣之陞左僉都御史巡撫山東擇有司佈各郡審編戶則以均徭役王師討逆濠道經濟魯籌芻糧供億兵皆無敢犯者及六飛南幸有司預集夫役數萬候境上疫作且乏食第令及期無誤悉散歸活者不可勝計鎮守指以供御大肆科索珙正色責之欲擊以笏乃止陞右副都御史巡撫陝西秦中宗室蕃衍祿每不給爲有司累令多方務積折補其數上下稱便河湟黠寇欲南下牧馬督固原將士嚴兵禦之遂遁歸畧無所失邊民安堵陞南京大理寺卿擢兵部右侍郎卒賜祭葬于

城東蓮花源之原崇祀鄉賢子二長道平廕國子生

王輔字良佐灤州人登宏治己未進士授行人兩使封藩陞南京監察御史遷河南副使時逆瑾向所司索天鵝絨布千疋無則折價各府歛解八萬兩輔曰此民膏血我甘鼎鑊不可從發回給民瑾因假會審鄧丙事謫輔陽城縣知縣遷戶部主事歷員外郎中復陞河南副使以疾乞休鄉人稱爲長者祀鄉賢

魯鐸撫寧人登宏治壬戌進士授岳州推官陞大理評事會逆瑾擅權有黨繫獄鐸忤瑾竟抵罪謀中傷自分必死乃以他事謫河內縣丞瑾事敗轉沂水縣令陞刑部

主事歷官至山東按察司分巡海道爲人執法不阿遠人服之

陳鼐遷安人宏治壬戌進士勤儉明敏歷曹濮彬桂兵備副使每臨陣躬親督帥斬獲甚衆崇祀鄉賢

翟鵬字志南撫寧衛人正德三年進士除戶部主事歷員外郎中出爲衛輝府知府調開封擢陝西副使進按察使性剛介歷官以清操聞嘉靖七年擢右僉都御史巡撫寧夏時邊政久弛壯卒率占工匠私役中官家守邊者竝羸老不任兵又番休無期甚者夫守墩妻坐鋪鵬至盡清占役使得迭更野鷄臺二十餘墩孤懸塞外久

棄不守鵬盡復之歲大稔請於朝以

坐劾總兵官趙瑛失事爲所訐奪職歸二十年八月

答入山西內地兵部請遣大臣督軍儲因薦鵬乃起

官整飭畿輔山西河南軍務兼督餉鵬馳至俺答已飽

去而吉囊軍復寇汾石諸州鵬往來馳驅不能有所

寇退乃召還明年三月宣大總督樊繼祖罷除鵬兵

右侍郎代之上疏言將吏遇被掠人牧近塞宜多

祿殺降邀功者宜罪寇入官軍遏敵雖無功竟願以

者當錄若賊衆我寡奮身戰雖有傷折未至殘生民者

罪當原於法俘馘論功損挫論罪乃有摧鋒陷陣不

斬首而在後掩取者反積級受功有遂巡觀望卒苟全而力戰當先者反以損軍治罪非戎律之平帝皆從其議會有降人言寇且大入鵬連乞兵餉帝怒令革職罷任因罷總督官不設鵬受事僅百日而去其年七月俺答復大入山西縱掠太原潞安兵部請復設總督乃起鵬故官令兼督山東河南軍務巡撫以下竝聽節制鵬受命寇已出塞卽馳赴朔州請調陝西薊遼客兵八支及宣大三關主兵兼募土著選驍銳者十萬統以良將列四營分布塞上每營當一面寇入境游兵挑之誘其追諸營夾攻脫不可禦急趨關南依牆守邀擊其困歸帝從之鵬乃浚壕築垣修邊牆三百九十餘里增新墩二百九十二護墩堡一十四建營舍一千五百間得地萬四千九百餘頃募軍千五百人人給五十畝省倉儲無算疏請東自平刑西至偏關畫地分守增游兵三支分駐雁門寧武偏關寇攻牆戍兵拒游兵出關夾攻此守中有戰東大同西老營堡因地設伏伺寇所向又於宣大三關間各設勁兵而別選戰士六千分兩營遇警令總督武臣張鳳隨機策應此戰中有守帝從其議且命自今遇敵逗遛者都指揮以下卽斬總兵官以下先取死罪狀奏請先是鵬遣千戶火力赤率兵三百哨至

豐州灘不見寇復選精銳百遠至豐州西北遇牧馬者百餘人擊斬二十三級奪其馬還未入塞寇大至官軍饑憊盡棄所獲奔鵬且實陳狀帝以將士敢深入仍行遷賞舊例兵皆團操鎮城聞警出戰自邊患熾每夏秋間分駐邊堡謂之暗伏鵬請入秋悉令赴塞畫地分守謂之擺邊九月間還鎮遂著爲令二十三年正月帝以去歲無寇爲將帥力降敕獎鵬賜以襲衣至三月俺答寇宣府龍門所總兵官郤永等却之斬五十一級論功進兵部尙書帝倚鵬殄寇錫命屢加所請多從而責效其急鵬亦竭智力然不能呼吸應變御史曹拜輔嘗劾

鵬鵬乞罷弗允是年九月薊州巡撫朱方請撤諸路防秋兵兵部尙書毛伯溫因併撤宣大三關客兵俺答遂以十月初寇膳房堡爲郤永所拒乃於萬全右衛毀墻入由順聖川至蔚州犯浮屠峪直抵完縣京師戒嚴帝大怒屢下詔責鵬鵬在朔州聞警夜半至馬邑調兵食復趨渾源遣諸將遏敵御史楊本深劾鵬逗留致賊震畿輔兵科戴夢桂繼之遂遣官械鵬而以兵部左侍郎張漢代鵬至下詔獄坐永戍行至河西務爲民家所窘告鈔關主事杖之厥衛以聞復逮至京卒于獄人皆惜之初鵬在衛輝將入覲行李蕭然通判王江懷金遺之

鵬曰豈我素履未孚于人耶江慙而退其介如此 明史

王念遷安人副史和之子登正德辛未進士部使欲為立坊念以民貧謝寢之事母孝謹盡以先業畀兩弟知九江府修復廢毀民不病役在程蕃奏開貢額使知向化居鄉廉靜足跡不入公府平居鼓琴遊吟居喪用家禮士大夫化之崇祀鄉賢

王道中撫寧人登正德甲戌進士授安慶府推官太湖人多避差有一人至縣即令賠納蕩產傾家民苦最甚中親詣其地婉曲曉諭止令辦納已賦民甚稱便揚州知府孫某者為御史張士隆劾奏贓私巨萬朝廷遣給事

中王俊民同御史陳傑會勘久之未決中一勘輒明時宸濠之變餘黨未盡當事者往往以平民誣作奸細收捕甚冤中查有贓仗旗幟止坐四人餘三百餘人盡釋之庚辰陞刑部主事嘉靖癸未轉員外郎甲辰陞鴻臚寺右卿旋轉左卿十二年侍經筵敬謹如一乙未改大理寺右卿乙亥陞順天府尹辛亥卒著有黃齋集

廖自顯字德潛盧龍衛人家貧力學以廉耻自持登正德辛巳進士知穎上縣賑饑活數萬人陞御史視通州倉革中官監收弊按宣大劾鎮將科斂及殺降冒功山西巡撫與叅議以小嫌爭忿劾罷之嘉靖庚寅鎮守建昌

太監缺疏請裁革遂更遊擊將軍一時稱便出按山東
巡撫邵錫清德藩軍校詭冒不從毆府卒乃劾其長史
承奉官爲所中錫罷待罪出自顯知汝寧府二載持法
不撓罷歸居家二十四年日與故人徜徉東郭蓮池芝
壘間有拾燼集放言憫遺集從任際可進士獻可舉人
不急仕進三十餘年銓知卽墨旋垂橐歸亦里中高士
云

張文成遷安人正德中以吏員任陝縣典史時流寇猖獗
逼城成奮身出戰多所斬獲總督彭公聞其才檄領兵
馬六千分路勦殺前後得首級千餘顆汝寧上蔡等路

悉平功加三級邑人爲立祠舉入名宦鄉舉飲賓輿論
欽服崇祀鄉賢

趙得佑盧龍人御史忠之曾孫三歲失恃長爲諸生遭隣
人橫逆而讀書自如人服其雅量登嘉靖癸未進士甫
三月授陝西道御史巡按應天掌南京畿道嚴察蘇松
等府案牘及糾劾輔臣羣黨側目外轉貴州僉事未幾
以邊材調遼東再調山西兵備分巡冀南道轉貴州畢
節道陞山東叅議分守遼海東寧道陞陝西副使備兵
肅州其在貴州却金而服蠻苗及撫哈密酒泉頌之陞
陝西行太僕寺卿致仕歷任二十七年以清介終林居

泊然宅第敝甚郡守紀公巡以罰鍰置瓦甃于城局將
爲葺之得佑聞而艷然曰得佑薄宦時無敢取一介恐
虐地方今顧累及桑梓邪壽七十三卒

李涵遷安人按察副使金之子孝事孀母以田產讓弟登
嘉靖癸未進士爲戶部郎督兌運尙書稱爲廉吏知延
安府除水患賑饑民備兵肅州修嘉峪城軍民勒石記
績補貴州兵備洗冤澤物民有天星之謠轉左布政擒
首惡龍許保等苗民率服崇祀鄉賢

盧耿麒字仁淑樂亭人梁長子年十三入庠過目成誦弱
冠登嘉靖癸未進士授工部虞衡司主事歷員外郎陞
陝西僉事屯田甘肅給戍牛種丁內艱起補江西僉事
洗數沉寃陞山西叅議比駐雲中當外叛甫平恩威並
著卽強藩亦斂戢防邊有運籌功建修五堡世廟賜綸
音有巨鎮賴以永安之褒復丁外艱起補山東叅議陞
山西副使以疾卒年四十有五麒貌玉立性直方篤孝
友父產悉讓二弟所居庭前無旋馬地尤博羣書詩造
唐語著藍山集涖官所至以明敏聞然議論辨博長官
前亦不少遜終以此取忌焉崇祀鄉賢

趙瑞昌黎人幼有才行于嘉靖壬午舉鄉試授河南伊陽
知縣居官清介逸興飄然出塵俗負陶靖節操卒無遺

金不能殲人皆痛惜

詹榮字仁甫山海衛人嘉靖五年進士授戶部主事歷郎中督餉大同值兵變殺總兵官李瑾總督劉源清率師圍城久不下榮素有智畧善應變叛卒掠城中無犯榮者外圍益急榮密約都指揮紀振游擊戴濂鎮撫王寧同盟討賊察叛卒馬昇楊麟無逆志乃陽令寧持官民狀詣源清所爲叛卒乞原而陰以榮謀告請宥昇麟死昇三千金俾募死士自効會源清已罷巡撫樊繼祖許之昇麟遂結心腹擒首惡黃鎮等九人戮之榮乃開城門延繼祖入復捕斬二十六人錄功擢光祿寺少卿再遷太常寺少卿二十二年以右僉都御史巡撫甘肅魯迷貢使留甘州者九十餘人總兵官楊信驅以禦寇死者十之一榮言彼以好來而用之鋒鏑失遠人心且示中國弱詔奪信官榘死者送之歸番人感悅踰年以大同巡撫趙錦與總兵官周尙文不相能詔榮與錦易任俺答數萬騎入掠榮與尙文破之黑山陽進右副都御史寇復大舉犯中路叅將張鳳等陣歿榮與尙文及總督翁萬達嚴兵備陽和而遣騎邀擊多所殺傷寇乃引去代府奉國將軍充灼行剽榮奏奪其祿充灼等結小

王子入寇謀據大同榮告尙文捕得皆伏辜榮以大同

無險乃築東路邊牆百三十八里堡七墩臺百五十四
又以守邊當積粟而近邊宏賜諸堡三十一所延旦五
百餘里闢治之皆膏腴田可數十萬頃乃奏請召軍佃
作復其租徭移大同一歲市馬費市牛賦之秋冬則聚
而遏寇帝立從焉寇入犯與尙文破之彌陀山斬一部
長榮先以靖亂功進兵部右侍郎又以繕邊破敵累被
獎賚召還理部事進左尙書趙廷瑞罷榮署部務奏行
秋防十事已而翁萬達入爲尙書遭母喪榮復當署部
務辭疾乞休帝怒奪職閒住越二年卒當榮之撫大同
也萬達爲總督尙文爲總兵三人皆有才畧寇數入不

能得志自後代者不能任寇無歲不入躡邊人益思榮
等明年俺答薄京師萬達榮皆已去論者謂二人在寇
未必至此萬歷中榮孫延爲順天通判上書訟榮功贈

工部尙書子卹如制

明史

王庚字文祥灤州人登嘉靖癸未進士天資純篤寡言笑
深易學後進多出其門三爲縣令有廉聲歷遷兵科都
給事中慷慨敢言陞山西叅政按察使陝西右布政卒
于官祀鄉賢

張智遷安人由明經知遠定縣潔已奉公剗洗奸僞時修
理學校政教大行有麥秀兩岐之瑞尋通判黃州民不

忍其去爲立祠號清張里人舉祀鄉賢

李充濁字澄之時之子嘉靖丙戌進士知葉縣收黃山巨

寇民爲立生祠與楚葉公漢王喬爲三令祠擢爲禮科

給事中屢上封事陞浙江右叅政改補河南修築隘口

自順德界抵山西延亘九百餘里陞陝西按察使辨宦

室子弟五人積寃陞河南右布政轉左尋改貴州賑銅

仁荒歉活萬餘人募民以備苗變罷歸于城北營萬柳

莊結故人爲飲社卒祀鄉賢弟充拙字逸之嘉靖乙酉

舉人與兄同榜知陳州俗刁豪滑戀公門恩文檄以擾

害鄉民號爲掛搭羅織久莫能去下車訪首罪杖殺之

餘衆悉逃散尋以母憂去補知南通州政平訟理卒于

官充濁子瀚字伯通處世閎以謹儉稱由歲貢授郟城

縣丞郟稱難治民流稅逋瀚于荒田立官莊捐俸創廬

舍三十餘區號爲俸餘官莊買牛給種招集逃民耕墾

收穫足公稅及傭值外餘入義倉備賑公私稱便民亦

復業銓部廉其賢擢知郟城未踰年辭官歸

韓梅字應元永平衛人嘉靖戊子舉人任大同同知六年

廉平多惠有范驛丞死于官妻流落鬻女爲婢梅捐俸

贖歸其母居家惇倫睦族鄉黨稱之

高擢字士元灤州人登嘉靖己丑進士由博士陞禮科給

事中建言侃侃得名諫議體歷副都御史風裁獨凜奉命提督操江苞苴絕跡晚鑿偏涼汀歸隱卒祀鄉賢王鎬字宗周灤州人登嘉靖己丑進士擢御史時張桂以言禮柄用鎬獨正色不阿歷都御史撫寧夏屢奏邊功以忤時乞歸卒祀鄉賢

厲汝進字子修灤州人嘉靖戊戌進士授池州推官徵拜吏科給事中湖廣巡撫陸杰以顯陵工成名爲工部侍郎汝進言杰素犯清議不宜佐司空並劾尙書甘爲霖樊繼祖不職不納三遷至戶科都給事中戶部尙書王杲下獄汝進與同官海寧查秉彝馬平徐養正巴縣劉

起宗章邱劉祿合疏言兩淮副使張祿遣使入都廣通結納如太常少卿嚴世蕃府丞胡奎等皆承賂受囑有証世蕃竊弄父權嗜賄張燄詞連倉場尙書王暉嵩上疏自理且求援于中官以激帝怒帝責其代杲解釋命廷杖汝進八十餘六十並謫雲南廣西典史明年嵩復假考察奪汝進職隆慶初起故官未至京卒祀鄉賢

史

王好學樂亭人臣長子領嘉靖庚子鄉薦嘗試南京父卒痛爲肖像及令陳留蠲逋修學擢刺澤州佐歸德在在多善政及補太原弭盜祥刑請治宗室驕橫檄撫石州

爲畫戰守之策歷陞戶部郎中督餉昌平時內使往來能正色戢之陞楚雄府知府乞休歸著有游藝集與弟好問並祀鄉賢

王好問臣仲子生有異兆弱冠抱當世志舉於鄉卽郤儼金登嘉靖庚戌進士授太常博士時分宜當權迺泊然自守久之方擢御史卽劾巨璫不法嘉靖末出按秦晉上興革便宜數事却諸祥瑞不以聞穆宗御極益多獻替而重孝思止行幸查內庫諸疏並劾近侍謀典兵柄尤極剴切遷大理丞歷通政使晉工部侍郎改刑戶二部擢南京右都御史拜南京戶部尙書憂時思職無一

少替南中米涌貴例當改折問遽發倉粟而後以聞詔賑江南不待移文發賑曰奈何稽朝廷意以忍飢民有古大臣風先是爲卿貳時卽抗疏求退至是章屢上始得優允歸數月卒賜祭諭塋贈太子少保天性好靜自奉澹泊立朝虔恭動由矩矱謙抑折節若不勝衣而內寔毅然不可奪鄉誼族範遐邇共孚所著春煦軒集三十六卷

賈韶昌黎人以明經授瑞安主簿志行嚴謹六載卒于官民感德爲之立祠

郝宗啟字文卿灤州人隆孫嘉靖丙午舉人授博平知縣

陞澤州知州學問深邃事親至孝居鄉勵行蒞政有聲
祀鄉賢

陳情字子孝灤州人嘉靖丙午舉人天性孝友見事明決
隆慶元年令孝義有捍禦保城功後令長葛宿松並著
廉明焚紅蓮七祖二百年肉身大得韓退之遺意慮州
城武備單弱造大炮十二位神鎗二百桿防守著有五
行奕數行于世崇祀鄉賢

劉復禮字曰仁號任齋山海衛人嘉靖壬子舉人坦易謹
飭宰長子縣刺渾源州遷冬官郎守保寧郡歷有異政
擢問卿駐寧夏預知唃拜反默爲防備尋丁艱致政歸

依居舊廬泊如也幼以孝聞暮年與季弟同爨每舉箸
必呼弟弟他往則不食季弟有子口授而教之亦成明
經里人有修郤者質成譬曉之皆愧服

蕭大謙字民服山海衛人僉事顯之孫性質樸雖屢空微
不介意遊成均時嘗拾遺金待還其人後領嘉靖壬子
鄉薦令懷仁秦安皆耻結納專意實政士民懷其撫字
而當道恚其無餽遺竟取忤罷歸行李蕭然至不能充
食處之自如年八十有一卒祀鄉賢

王大用東勝衛人登隆慶戊辰進士授扶溝知縣執法無
所阿當路銜之左遷東平州判陞滕縣令明習吏事每

事必探弊端有大璫進貢折辱驛官索乾沒大用詣郵亭令開篋驗之皆胖襖遣人收捕其解戶于獄大璫甚懼求免其明練肩事類如此陞大理寺評事改戶部郎中歷官遼東陝西叅政

韓應奎號東軒御史季弟爲童子饁田之暇苦志讀書中隆慶庚午鄉試五試南宮始謁選得華陰縣知縣有惠政華人頌之歷蓬萊樂安溫三縣皆以治績聞年未哀卽歸田常以睦族濟人爲念絕不一干有司歲大凶施粥賑饑給裘禦寒邑人德之二子長原濟倜儻不羣仲原潔篤信秉禮並諸生濟子乾業潔子坤業庚午兵變

長與仲偕亡

李安仁興州衛人隆慶辛未進士授武城令調繁興化興地利築河堤剔奸釐弊轉大理評事陞衡州太守威懾豪滑擢湖廣副使告歸

王胤祥撫寧人登隆慶辛未進士任偃城令吏治澄清恩威並著縣前苦水井化甘泉咸謂善政之感行取刑科給事中激揚盡力條陳九邊要務當宁嘉納之因劾江陵奪情外轉河南僉事進四川叅議後轉陝西副使當事特薦者凡二十餘疏以親老力辭杜門終養壽至八旬而終

王槐昌黎人貢生工書翰任中書歷工部左侍郎清慎正直不阿權貴世廟嘉其忠贈祖父如其官

齊宗堯號碣石昌黎人幼穎悟苦志力學年十八遊泮七舉不第乃以歲貢授山西屯留縣丞攝邑篆歲饑流離載途卽爲上聞開倉發粟以賑貧困賴以全活者萬計又寬逋負招流亡復業者五千餘人上官廉其能陞陝西鄜州判官值西戎猖獗堯躬親訓練號令嚴明虜不敢迫還陞屯留邑宰百姓歡呼于道曰吾父母復來矣初屯無逋運夫凡有差役比戶而徵民甚苦焉堯屢請各憲令沁州長子兩縣往來遞送屯民便之涖屯四載

招撫流亡四千丁墾荒田二千一百頃決獄如神不避權勢藩府理問枉殺人歲餘不決兵司稔知堯強幹命鞠之堯毅然馳入王府檢屍傷竟寘理問及用刑者于法又雪賈姓之奇冤申屈氏之枉坐一邑稱快有土寇楊富聚衆三千餘人分掠各邑殺沁州千戶巡撫勒兵捕討命堯率官軍二千人先往堯乃屯兵五里外單騎入山砦召酋首示以利害賊皆羅拜泣曰天使公活吾儕也卽釋甲焚砦以降尋以繁調定襄士民號泣不能留請祀名宦不數月陞汾州知州州人畏威懷德豪強屏跡隆慶丁卯秋虜犯境堯率素練精兵三千餘人分

城固守又於城下築墻以防衝突三日部分甫定虜衆百萬破石州乘勝長馳中外震恐乃令于衆曰汝等父母妻子俱在城內當于死中求生否則無噍類矣敢下城者軍法從事衆感奮無一人不盡死力者公亦披堅持銳躬冒矢石拒敵八晝夜賊知不可破宵遁堯率衆追襲斬獲三十五級搜捕城內奸細四十餘人以功奏擢河東轉運同知仍攝州事益練民兵造火器積糧餉築城池統制劉見而稱之謂雄鎮之兵不如也卒以鯁直忤強宗旋卽昭雪調忻州雖遭蹉跌而忠義之心不少挫至忻簡戎行陳兵事二十餘條雖不報而邊備已見施行矣樞省重其名方思大用終以守正不阿力辭解組歸尋以疾卒

劉思誠字性之號定宇山海衛人萬歷癸酉舉人英資卓識廉直公平領鄉薦十餘年毫無請託筮仕平原論編徵賦設法神速隣邑皆效法之遇荒多方拯救理訟稱平黷宮後有深壑數科荒落特爲築建五桂祠選俊秀肄業給饌伏臘不輟以是蜚英振起貧生婚葬不舉者捐橐助之招撫流遺蓋官房百餘間于郊外剏立集市墾田十餘頃藉以爲生方春躬行勸農力舉實政遷濟南同知署篆年餘吏請盤庫思誠斥之俸工俱以原封

出給不除其耗有鹽商犯科以鬻貯銀二千兩冒託餽酒當堂碎鬻解入府庫竟無赦當道議派民徭思誠勃然色變議遂寢終以忤貴拂衣歸事母飯必侍側舊產盡讓弟饒有孝友風平原有生祠入名宦崇正戊辰入鄉賢

韓應庚字希白東勝左衛人世有隱德曾祖文富而好施祖誠益大其業嘉靖中歲屢歉先後貸鄉人粟至二萬石不責其償父廷義生而英敏通百家衆技嘗擒巨寇以靖一方封監察御史三子應庚其長也少勵清操登萬歷丁丑進士授彰德府推官其治務廉明寬厚下車

取沈獄驗問數日間決斷殆盡受領新訟遣當直設竈公署前呼對簿者自炊未及餐而事已判矣平反冤獄無計入爲福建道御史出按甘肅直大祿不俟命卽發倉粟以賑再按山東鋤強豪黜貪墨共出死囚二百六十餘人時年四十七卽引疾歸日與親故徜徉山水間于城南二十里石磯上築室名曰釣臺以圖書花鳥自娛七徵不起從不干有司遇不平事輒爲代白聞者敬信昭雪罔敢後歲甲辰饑輸粟公府而施糜掩骼無虛日又鬻負郭田數百畝以贍郡邑兩庠貧士壽七十有四卒祀鄉賢

馮時泰字虞廷山海衛人幼敏學寒暑不輟登萬歷庚辰
進士授工部郎中管節慎庫自能握算覈積弊著聲曹
署陞遼東廣寧叅議守正不阿冰蘖矢操築造臺堡大
定老軍數十處無不竭盡心力邊警帥不用命失事時
泰奉勘畧無纖隱致忤當事坐譴或以苞苴請時泰徐
應曰吾泣官惟清慎二字可揭天日况君父之事烏容
規避絕不爲辭尋被逮遼民無不稱冤欲詣闕號鳴總
督顧養謙止之乃極爲辯雪有並褫臣職以辨其有功
無罪等語具載疏中趙相志臯張相位石司馬星皆交
章激切力諍竟不白時泰嘗自嘆曰由來直道忤當權
過貶潮陽路八千一掬忠肝天所鑒幾回血淚洒蠻烟
竟以疾死獄中

白鑰東勝衛人少穎慧爲郡諸生居家孝弟事兄如父嫂
如母由國學選南錦衣幕官遷汶上丞執陳友寬等大
盜置之法鋤醜植良百姓德之無何挂冠世高其恬退
處鄉恂恂課三子寒暑不輟長珩季璞皆廩生仲瑜登
萬歷乙未進士歷官刑部尙書另有傳

高第字登之灤州人登萬歷己丑進士初令臨穎徵賦不
折封印以原櫃解府力絕耗羨歲大歉賑粥療醫活數
萬人轉戶曹權濬野關舊例支河設繩防貨舟欄出第

日但鑠正闕衣帶水足矣何淵察爲一切報罷陞大同
守捐俸贖補宗祿三千金歷楚秦藩臬擢御史中丞巡
撫大同費橐七千金助給撫賞尋陞兵部尚書時魏崔
黨熾璫以提督郭欽求加都督同知叅將梁甫求陞總
兵矯中旨特授第皆不應揚左被逮榜掠甚慘第經筵
力陳黨錮宜釋忠賢怒喉熹宗召對切責之會寧遠警
遂出第經畧薊遼拜命隨檄道鎮堅壁清野固守而崔
呈秀銜前恨劾第不發兵爲怯勒令閒住崇正初年詔
復原官因己巳郡城陷復謫居無棣己卯放還歸里建
白雲樓爲東山之墅平生湛于理學所著有太極良知
等說撫雲疏稿籟真等集年八十二卒祀鄉賢

朱文運盧龍人侶子萬歷己丑進士任丹陽知縣勵精撫
字政簡刑清邑紳大司馬姜公欲改運河于城外以興
貿易運恐勞民固執不從後五年考績稱最竟遷南戶
部主事時人爲之不平至任六月奉差入都因歸省母
卒于家子方九齡宦橐蕭然繼室李氏課子治家不墜
先業子濟美廩生孝友篤行庚午之變遂謝功名凡三
教六壬醫卜之書無不兼通

王渾然好問子中萬歷辛卯舉人授中府都事歷刑部郎
中時南康守吳寶因稅璫李道誣奏被逮然問擬還職

上怒罰俸三月南康得以從輕微生光妖言事東省無
行老生流言彼中有聞者然恐蔓延無辜解發山東撫
按鞠問保全大族甚夥陞馬湖府知府革漆戶板稅修
學繕城奢酋爭殺片言力解總督王象乾題擢遵義兵
備副使下議時疏請骸骨歸尋卒著蜀遊草

白瑜東勝衛人少英敏博學善詞賦登萬歷乙未進士授
庶吉士除刑科給事中上疏請革煤稅降湖廣按察司
照磨起歷通政使刑部左侍郎居鄉和雅卒贈刑部尚
書

張國祥昌黎人幼失怙恃父昂上元主簿歿遺妾王氏年

十九砥節苦守祥長奉事如禮師邑侯孟秋講學力行
不倦後師楊公啟元悟羅近谿性命宗旨由明經任豐
潤訓導以身率士士風丕變建魁星樓以培風氣豐庠
科甲自此盛焉陞涓源令甦驛弊減雜徭除奸保良罷
民再起有番里曰南川不習文教祥擇其子弟朱際昌
勸課讀書力薦入泮以鼓吹送歸里中番人聚觀者塞
山野文教以興及解綬歸囊無長物惟以琴書自娛耕
讀課子邑大夫及鄉里推重之尊爲模範數舉鄉賓

趙養蔚字青城灤州人萬歷庚子舉人少負經濟畧富甲
平灤已已戒嚴蔚捐貲建城內外炮臺造銳礮數百位

募丁守城費以數萬計時士紳多竄逸獨蔚守孤城矢死勿移傾竭家財犒援師介馬謁樞輔于關門請兵恢復事聞授中書舍人加職方主事以未通籍不肯受官疏請里居大修城池禦侮之具遠近倚重年六旬卒贈尚寶卿祀鄉賢

陳王庭字心龍盧龍衛人登萬歷丁未進士歷太僕寺卿寬厚清謹天啟中矢貞不附魏璫先嘗巡按遼東得將士心遼失收養全活甚多庚午城陷王庭服堊幾死復甦爲黃冠大帥祖大壽張存仁輩皆伏拜牀下報德恐後事平論者議其不死逮獄絕粒而殞

李應奎興州衛人由明經授扶溝訓導值大旱奎積誠祈雨立應扶邑立石紀之陞歷城縣教諭適縣令欲于文廟坐困收糧奎不許令固不從因嘆曰微末一官職不容守尚可戀升斗昧吾心乎毅然掛冠歸年近九旬邑侯張公九三素仰奎名歲時存問數舉鄉賓且念其貧而無後欲爲贍後計乃笑曰清苦一生將就木矣昔閔仲叔不以口腹累安邑吾豈以後事累令支乎不通片楮奎初受麟經傳于邑侯白公夏至今遷邑業春秋者皆其遺也

韓原善字繼之別號鵬南父應箕字希臯御史之次弟也

負文武才兼精騎射倜儻尚誼有古俠客風嘗出兩嬰孺于劇盜手凡疎族貧交待以舉火者恒數十人構宗祠修世墓繕義塾動費不貲無幾微恡色以明經入對大廷不仕原善生而穎悟沉酣經史旁及青鳥黃石奇門遁甲諸書靡不研究登萬歷丁未進士授青浦縣知縣吳淞久塞震澤澱湖之水合流東下民苦昏墊爲請賑請蠲平糴設粥不遺餘力而躬行給散卒事無譁者他如裁公正均荒絕開津貼甍塘夫清漕兌無不懇惻周至邑人尸祝之調繁長洲爲吳郡首邑賦役甲天下又當水陸之衝治之獨遊亦有餘縣田一百二十二萬三千畝自剏立官甲政在鄉紳詭計花分民戶坐困巡撫徐公請均之原善身任怨勞按畝科差增役田三萬一千四百七十頃精于造士是歲中鄉闈者十人五年考最稱廉治窩訪觸忌僅遷戶部郎在縣時父嘗斥產貽之佐廉及轉戶曹父益喜爲能不瘠民以媚當道也旋丁外艱服闋補兵部東事方棘以不次推開元兵備拜命疏陳方畧八款又言召募有六難有四易疏入上遂俞發帑金七萬四千抵關門五十日募官兵一千六百餘名馬六百五十餘騎甫出關而開元報陷乃兼程趨至廣寧先是全遼軍需仰給海運萊津歲運二十萬

卸三犂牛地距遠六百餘里水陸煩費原善冒雪行至海上經畫以登萊海蓋兩道累年會議不決者定泊蓋套歲節費數千金不匝月而完糧二十二萬丁母艱歸屢薦不起卒原善生平孝友性豪爽有遠畧周人之急有如其身所著詩文八卷奏疏二卷尺牘四卷六壬指掌二卷祀鄉賢

張聯奎字輝含灤州人萬歷己酉舉人除彰德司理有張佛之頌以直忤左遷秦臬幕署商州輯流亡多善政尋復理臨洮閱河西五鎮活楊弁孥累百口臨鞏帥以幕金三百餉却之再餽珠簾庭責其役而揮去曰奈何况我邀覃恩贈父如其官以邊才擢慶陽郡守流賊寇城單騎諭禍福輒解散因積勞謝病歸僑寓邢臺時給諫馮公可賓及臺中交薦不赴邢破配田氏不屈遂遇害奎困頓旋里環堵蕭然銜杯嘯歌晏如也年六十有九無疾卒

石維嶽字五峯灤州人登萬歷庚戌進士筮中牟令以坦直拂相國謫河東鹽運司知事相國卒事乃白擢推官陞刑部主事歷郎中時魏璫焰烈奪戚畹李承恩園置之獄法司希魏意擬辟嶽抗言曰殺人媚人當何律卒以園歸李出守懷慶建告帝堂凡晝行事錄卷焚之韓

昌黎裔有在懷者式微訪得之復其業爲建祠置奉祀
生旣而璫祠遍天下懷人以請嶽曰俟我去若輩自爲
之以故璫敗懷獨無逆祠遷長沙副使岷王妃奏王被
弑狀下兩臺訊嶽廉實逮撫按以下十九人崔呈秀爲
魏璫義子嶽以妃事觸怒且羣小嫉之因媒孽戍薊州
妃特疏昭雪嶽終不自明年七十餘卒崇祀鄉賢

郭鞏字德固號金谿遷安人登萬歷癸丑進士性剛介甘
澹泊筮仕行人考選給事中凡封疆大事劾奸斥佞不
避權貴侃侃直陳值魏璫用事告歸杜門謝客屢起太
僕太常兵部左右侍郎凡七召俱以病固辭疏云臣之
病不在四肢而在腹心微詞規諷忠愛彌篤居鄉雍睦
卽野老村夫莫不敬而懷之

劉廷宣字化卿號方壺晚號木菴山海衛人登萬歷癸丑
進士丰神清穎廉直謹飭筮仕儀封勵學校恤鰥寡課
農桑勸孝弟河汜淪治之獲名田幾萬畝民賴以蘇徵
賦絕耗羨訟俱自拘不判贖設保甲法崔苻克靖革一
切無名科派省民鏹不下巨萬擢浙江道御史強章不
避中貴巡按陝西未復命轉爲大理丞假歸未半載尋
因母老請終養以大理寺少卿歸甲戌六月病卒

白廷魁字復古號雪軒灤州人由明經任臨縣令出供具

學宮月再課士歲以爲常催科不擾訟獄者理而遣之不責贖緩時稅桑田助耕歛以不善俯仰中忌調簡遂拂衣歸以壽終

王調元字燮伯號和陽撫寧人少孤奉母王氏至孝年十七爲諸生嘗讀書僧舍雜鐘魚梵唄間二十年如一日萬歷戊午舉鄉薦謁臺使劉公臚母守節撫孤狀疏奏奉旌因母老仕嵩縣教諭做胡安定教士法與諸生相切劘有勢家僕辱士元不畏強禦力培士氣陞臨朐令時流寇犯河南朝議以修城垣練鄉勇爲守令殿最胸城故版築地高無水廛閉鱗次附女牆而居者千餘家

令下之日元曰賊遠在二千里外先使吾民婦子露處失業是人心先自解也值憲司單騎來視高墉屹屹守禦之具纖悉畢備深歎其言爲是調知滕縣先是妖賊徐鴻儒之亂滕人死者無算又地鄰曹濮多椎埋探丸之盜元令嚴法治有犯必誅於是奸盜屏息境內肅然亡何以懃直罷歸家居三十年未嘗一履公庭故人在銓部招之不往又屬臺使起之堅以疾辭生平重然諾不以生死盛衰變易年八十有五卒少宰石公申儀部余公一元表誌其墓

馮運泰字六符灤州人斗華長子萬歷己未進士弱冠登

賢書聲譽藉甚事繼母以孝聞尤篤友愛令堂邑聊城以和靜豈弟爲治恤民造士兩邑爭尸祝之陞工部郎監修三殿綜覈勤密省帑金數萬兩敘功擢太僕卿假歸省視以違限奪官父子並祀鄉賢

陳三緯字泰華灤州人以明經除修武丞精毅廉潔弗染習汚遷鎮原令漢史高平第一壘也荒敞特甚撫恤瘡痍捐俸薪代完逋賦請告歸里解橐助城工行誼咸推長者崇祀鄉賢

倫之楷字百式灤州人天啟丁卯舉人夙負經濟有應變才知榮穎時值大盜號一條龍者糾衆圍城年餘百計攻擊楷應有餘力乘夜晦出奇兵盡殲其醜敘功以卓異召對平臺擢御史奉命巡漕擒大蠹以清漕政鬚髮爲白劾逃帥懦撫論陳啟新以上書倖得給諫直聲震殿陛丁艱歸臺使屢薦不起卒祀鄉賢

張汝賢字景宣灤州人天啟丁卯舉人仕定陶令清廉愛民事至立斷時羣賊蜂起賢不動聲色密計招誘得通巢穴擒獲渠魁李之茂等四境肅清擢鞏昌郡丞值流寇攻城畫戰守奇策懋著軍功且賑飢掩骼惠政累累陞臨洮府知府遷莊浪道以勞瘁乞休歸里年七十二卒祀鄉賢

鄭卿字省吾灤州人由貢仕河南府通判清慎自持有懸
魚酌水之風衙齋閒寂與名彥彈琴賦詩抗疏歸里力
辭聘徵著省吾詩文集祀鄉賢

翟凌雲字崑瀛撫寧人由明經授肥城令不畏權勢除巨
奸大蠹擢兗州府同知濬河有功省帑銀四十萬爲共
事者所忌罷歸林下三十餘年闔門養重稱鄉望焉

龍呈圖昌黎人積學富文天姿和厚由明經任鄧州佐陞
山東都司經歷廉靜有爲解組歸崇正庚午捐貲鼓衆
登城守禦以功加四品服授中憲大夫

蕭奇棟號擎元撫寧人由恩貢任蒲令時流寇猖獗民不
聊生棟多方撫循悉備戰守之具百姓恃以安輯一時
戴之尋陞南陽府同知卒于官

王之葵撫寧人由明經任徐州州判智明膽決不肯阿徇
當流寇之亂州牧自焚葵亦堅求自盡士民力救得免
以徐水陸要衝憲司勉以代篆視事三載撫恤瘡痍安
輯流離民得復業一時賴之

詹廷字忠卿號紹山尙書榮之孫由諸生補廕筮南通政
幕以吏才著陞順天府別駕廉能有聲陞南比部主事
遷本部郎中陞廣南太守時奢酋叛滇南一帶搖動廷
赴任被圍賊脅降至再誓以全家殉賊揣廷志不奪稍

縱閱月得乘間出遂達省備陳賊形及守禦之策捐俸
 以助軍需蒞任二載多善政除蠹愛民寬猛兼濟奏最
 之日輿疾歸廣南士民建祠祀之

...

...

...

...

...

...

